

Ebe ni iPo^{lu} o keke ghi egbo **IRoma** **Eni e miesuo**

Otse oyi iPo^{lu}

¹ Mhemhe iPo^{lu}, oni o^o ga oyi iJesu iKirisiti ni a lu mhi khi aghiusomhi na keke, ni a ze o le mhi ke tsabo usomhi onete oyi Eshinegba. Mhemhe mhi keke ebe ona.

² Oni usomhi onete ona khi, oni Eshinegba o shobo shi eke, rote unu oyi emekeguele eyoli ni a keke shi Ebe-no-pfuase.

³ Oni usomhi onete o ya khi, ingme oyi omi oli ni o rote unuekpe oyi iDefidi lasele elemhi idiegbe.

⁴ A rote ekpabo oyi Ayemhe-no-pfuase roli khase, ikhi iJesu iKirisiti Onomhue oyawa, khi, Omi Eshinegba o khi, abi o ro rote eghuli guise oli le.

⁵ Rote obo oyi iKirisiti ali eva oyoli anye te mie afu ro khi ighiusomhi na keke eyoli, ni anye ro ri egbo iJeta nya bhale ya sueso na Eshinegba. Isueso ni o rote irudunga bhale.

⁶ Ee egbo iRomu a li la eni Eshinegba o lu, ni a li khi enayi iJesu iKirisiti.

⁷ Ee ni a la iRomu nya a keke ebe ona ghi. Ee ni Eshinegba o nono ingme oyewe ni o ze, ni a khi egbo eyoli.

Okhale ali opfomhe e ka khi eye e, rote obo oyi Eshinegba ita awa ali rote obo oyi iJesu iKirisiti Onomhue.

⁸ Onodode, mhi ri eva oyi iJesu iKirisiti tse Eshinegba oyemhe uwegbe shi agbo oye e nya, irari khi a she la ashakpa elemhi eke agbo suo eko irudunga ni a mholi.

⁹ Eshinegba ni mhi ri udu oyemhe nya a ga, ni mhi a tse abo usomhi onete oyi omi oli, o khi otsele oyemhe, khi igesikia mhia ngme, khi egheghe kpa mhi ro o sa to e egbe ini mhia so iromhi.

¹⁰ Mhia lema Eshinegba o khueghie ode-a na mhe ni mhi me asha bhale ya me e ikpukhokho abi o ghole oli shi.

¹¹ O ma ghole mhe gba ni mhi ro me e, ni mhi ri ose e eyi ayemhe na e, ni o re e ya toto irudunga.

¹² Emini mhi ri ona ngme khi ni a ro bhale ya e khi awa mhu e ikpaghiobo na egbe. Mhi kha zese e-a, ee a zese mhe-a.

¹³ Emole mhe, mhia nono ni a lese khi, ebubu egheghe mhi she gba li khi mhi bhale ya feli e, ni mhi gbo ri egbo bhale irudunga abi mhi kpe lie ri ele oli ifuabo egboese ni e khi iJeta, ama, ozuode o zu mhe ode.*

¹⁴ Egboli oyemhe o khi ni mhi ro tse abo ona ye egbo kpa, ghe egbo iGiriki ali eni ea khi iGiriki, ene fialo-a ali eni ea fialo-a, shi eni mholi egbhali ali eni ea mholi egbhali.

¹⁵ Igho, o gbo lie kphakpha mhe egbe ni mhi ro li gue oni usomhi onete ye e ni a la iRomu.

Ekpabo ni o la oni usomhi onete

¹⁶ Omama oni usomhi onete o ya mu mhe, irari khi loli o khi ekpabo oyi Eshinegba ni a ro o tsumhi

* **1:13** Li ze Ika 19.21

ogbokpa ni o miesuo, egbo iJu o kpe ramhi egbe, neni o tigbe ramhi egbo iJeta egbe.†

17 Oni usomhi onete ona o guele abi Eshinegba o lie mie ogbokpa ni o mholi irudunga. Ezeze abi Ebe-no-pfuase o ngme khi, “Oni Eshinegba o ri irari irudunga oyoli pfa na, o ya la agbo.”‡

Elemhi ibibi oyi Eshinegba

18 Idane elemhi ibibi oyi Eshinegba o te e tiemhile shi egbo ni ea miesuo ali ena okholo nya o, ni e ri okholo oyewe e khukhu egbo alo ini e khi lese igesikia oyi Eshinegba.

19 Aborokhia khi e lese emini a dobe a lese ingme oyi Eshinegba, itobo khi o khueghie oli-a khasewe wewee gboo.

20 Irari khi rote igbaekele agbo a te mewee ekpabo ali ufumhi ali abi Eshinegba o li gboo. Emini o ma nya o ri awa mholi ilese abi o li. Onana o zee khi egbo ea mhue emini e ya lie khi o zee ni wewee ea ro miesuo.

21 E lese Eshinegba, ama ea kueghie oli abi Eshinegba, wekhi eri e kphemhi oli. Ochogho, isamhi afue ee sa, igho udu ooyeghe oyewe o bishi-a.§

22 E khi, eni e fialo-a wewee e khi, ama e mele eyegehe-a.

23 E ya oghie ufumhi ni a ro na Eshinegba ni o la agboagbo na ikhumhi ni a mama ro khokho ogbo ni o oghu ali ipfeli ali elamhako ali emini ee ti akpidi eke.*

† 1:16 Li zee iMak 8.38 ‡ 1:17 Li zee Abak 2.4 § 1:21 Li zee Efi 4.17-18 * 1:23 Li zee iDeut 4.16-18

24 Irarigho, Eshinegba o ro rue we obo-a na oghumhe olamhe oyi udu eyewe ali itsebo ni e nu egbewe e li.

25 E ri egbholi oghie igesikia oyi Eshinegba. Ee ga emini a ma, ocho ni e kha ro ke ga Ima, oni o khi oni a kuoghie ya ramhi ele ni agboagbo. Atse.

26 Itobo ona, Eshinegba o ro rue we obo-a na oghumhe omama. Egbegbi ikpotso eyewe, e nu egbe we e gbhe.

27 Igho li khi eni emose, ocho ni e kha ro le ke deba ikpotso, emose na abi wewe ee ghole we inugbhe. Emose e gbe ikanya omama ke deba emose, irarigho, e she mie ifata ikanya ebe eyewe.

28 Irari khi ea lama ri egbegbi ilese oyi Eshinegba ni e mhue shi udu, Eshinegba o ro ze we obo na isamhi ebe udu oyewe ni e ke riele emini ea kha riele.

29 Okholo khi okholo nya o keshe we-a, ghe ingmobe, ghe emhi ito-egbe, ghe ubogbo. Ofuma ikpekpe o vo we egbe, ghe ugbeli, ghe okholi, ghe ikpamhika, ghe obe-imumu. Eni e tsue egbo kiakia e khi.

30 E ri unu e yese ogbo-a, ee biselemhi Eshinegba, ezunu-obe, ni ea mhue ekpe, ni ee tono obo udu. Ode ebe ni a ro li okholo enegbo, ee sa ro lasela eghenge kpa. Ea ya suo eso na itawe.

31 Ea mhue ileasingme, ea ri ishobo oyewe a gbe akanya, ea ya ti elemhi ogbo wekhi eri e mhue ilelemhi na ogbo.

32 E lese khi ushi oyi Eshinegba, oo khi, egbo ni e li na ngeli, eni e ya pfua e khi, oa khi eri e lese e riele emhi eghogho tse, ama ee mie obo shi eni e gbe ikanya eghogho o.

2

Iguezo oyi Eshinegba

¹ Yeye ni u wa gue egboese ezọ, waa mholi obini u pfue o ya je, irari khi eghẹghe kpa ni u ro gue ogboese ezọ ne, egbe e wa gue ezọ, itobọ khi yeye oye u lili e riẹle eni emhi.*

² Awa lese khi ezọ ni Eshinegba o gue egbo ni ee riẹle emhi eghogho, khi igesikia o deba gue oli.

³ Eri u dabi khi ini yeye ogbo afuafuafue u gue egboese ezọ, khi yeye u li riẹle oni emhi oghogho, khi u ya pfue ezọ oyi Eshinegba?

⁴ Abi khi eri u ri eloe e gbe isomhelemhi ali iregbemie ali irabomudu eniemhi eyoli, nu waa lese khi isomhelemhi oyi Eshinegba o re ramhi imupfi?

⁵ Ama irari igbiti ali udu ni o a mhue imupfi ni a mhue, a ro khi ma ofu oyi Eshinegba, ni o ro ya na e osoli, eghẹghe ni iguezo oyoli ni o a mhue azeba o ro ya feli lasele.

⁶ Eshinegba, “O ya fali ogbogbo ota abi o li gbe.”†

⁷ O ya ri agbo na agbogbo na egbo ni e mhue irabomudu e riẹle onete, ni ee nono ufumhi ali agbo ni o a mhue ukpese.

⁸ Ama egbo ni ee na shi oyewe tse, ni ea ri esọ shi igesikia ni o la ungmehi oyi Eshinegba, ni e deba onobe vu, Eshinegba o ya tiese ofu ali elemhi ibibi oyoli le shi we o.

⁹ Egbo eni ee riẹle onobe nya e ya me osoli ali oya. Okekhi egbo iJu, okekhi egbo iJeta.

* **2:1** Li ze iMat 7.1; iLuk 6.37 † **2:6** Li ze Iwolo 62.12; Ekpi 24.12

10 Ama Ẹshinẹgba ọ ya ri ufumhi ali itinga ali opfomhẹ na ẹgbọ nya ni ẹ riẹlẹ onete. Okekhi ẹgbọ iJu, okekhi ẹgbọ iJeta

11 Irari khi Ẹshinẹgba ọa ya zọlọ ọgbọkhọghuo.‡

12 Ẹgbọkpa ni e lamhẹ olamhẹ ni ẹa mẹ ebe ushi deba, ọgbọ ọa rọte ebe ushi ya gue wẹ ẹzọ, ama ẹgbọkpa ni e mhue ushi deba ni e lamhẹ olamhẹ, a ya rọte ushi gue wẹ ẹzọ.

13 Irari khi ọa khi ẹgbọ ni e suọ abi ushi ọ ngme tse Ẹshinẹgba ọ ya liẹ khi e pfuase, ama eni e suọ abi ushi ọ ngme ni e rọli ẹ gbe akanya, Ẹshinẹgba ọ ya pfa na khi e pfuase.

14 Ẹghẹghẹ kpa ni ẹgbọ iJeta, ni ẹa mhọli ushi, e rọ rọte angeli oyewẹ ri ushi gbe akanya ne, eri e rọkhasẹ khi e leşẹ emini ọa ti ali emini o ti ni a riẹlẹ, ini ẹa ririẹ mhue ushi.

15 Eri angeli oyewẹ o rọkhasẹ khi emini ushi ọọ a ke riẹlẹ, khi e keke ọli shi udu, udu oyewẹ ọ pfi ọtsele shi ọ, isamhi eyewẹ ni ẹ gue wẹ ẹzọ isheghuo, e gbo khe wẹ shi eke.

16 Ighọ o ya li ogbele ni Ẹshinẹgba ọ ya rọte obọ oyi iJesu iKirisiti gue wẹ ẹzọ ri osheli oyewẹ lasele abi mhi li ri usomhi onete tse abọ.

Ẹgbọ iJu ali ushi

17 Ini a lu egbe ẹ ẹgbọ iJu, a ri egbe da ushi ri Ẹshinẹgba a tono obọ udu,

18 Ini a zẹ Ebe-no-pfuase leşẹ ọghuemhẹ oyi Ẹshinẹgba, ni a gbo leşẹ emini o gbe akanya,

19 ini a leşẹ khi ẹẹ a khi eni ẹẹ seşẹ ezalo ode, ni a rọ gbo khi ákpá na ẹgbọ ni e la alo ebili,

‡ 2:11 Li zẹ iDeut 10.17

20 a ye ẹgbọ ni e khi eyẹghe ude, a sẹsẹ eni ẹa lẹsẹ. A mhọli ọli shi udu khi ilẹsẹ ali igesikia o gba pfo shi elemhi ushi.

21 Ẹẹ ni a sẹsẹ ẹgbọsẹ, elọ o zẹ khi aa ya sẹsẹ egbe ẹ? Ẹẹ ni a liẹ ọgbọ ọ khi do ughiatọ, àá liẹ do?

22 Ẹẹ ni a liẹ ọgbọ ọ khi kia okia, aa liẹ kia okia? Ẹẹ ni ikhumhi igaga ọọ kpasẹ, aa liẹ do ughiatọ elemhi Owa oyi Ẹshinẹgba?

23 Ẹẹ ni a tonon obọ udu khi a mhue ishi eyi Ẹshinẹgba, aa ri omama mu Ẹshinẹgba abi a liẹ gbe eni ishi-a?

24 Ebe-no-pfuasẹ ọọ khi: “Irari ẹẹ ni a khi ẹgbọ iJu ẹgbọ iJeta e rọ ọ zẹ emuebe na eva oyi Ẹshinẹgba.”§

25 Ini a ri ishi a gbe ikanya, oshẹlẹ oye ẹ o rọ mu eloe, ama ini a gbe ushi-a, eri a li abinẹ khi aa shẹlẹ-a.

26 Ini ọgbọ ni ọa khi iJu ni ọgbọ aa shẹlẹ-a ọ ri ushi oyi Ẹshinẹgba gbe akanya, Ẹshinẹgba ọa ya leli ọli shi oni aa shẹlẹ-a?

27 Itobọ ighọ, ẹgbọ iJeta e ya pfa ezọ mu ẹ iJu itobọ khi a gbe ushi-a, aboriẹkhia khi a kẹkẹ oni ushi shi ebe na ẹ ni a gbo shẹlẹ-a, ama wẹwẹ e ri ushi ẹ gbe akanya ini aa ririẹ shẹlẹ wẹ-a.

28 Ọa khi itobọ khi ọgbọ ọọ ngeli abi ọgbọ iJu ali itobọ khi a da shẹlẹ ọli-a ọ rọ khi egbegbi iJu.

29 Ama oni ọ khi egbegbi iJu ọ khi oni ọ ri ushi ẹ gbe akanya, Oshẹlẹ na ekelemhi udu o khi igesikia oyi oshẹlẹ, ọa khi ona ẹkuẹ idiegbe oye. Ọgbọ ọghoghọ Ẹshinẹgba ọọ kuẹghię ọli, aa khi ẹgbọ ẹẹ kuẹghię ọli.*

§ 2:24 Li zẹ Aza 52.5 * 2:29 Li zẹ iDẹut 30.6

3

¹ Ighe eleli ni ẹgbọ iJu, ikhi eni a lu eni a sheḷe-a, e mholi doṣe ẹgbọ iJeta? Ighe eleli ni o la o na ẹgbọ ni e lu egbewe eni a sheḷe-a?

² Èleli o la o na oḡbọgbọ ode khi ode. Odode, ẹgbọ iJu Ẹshinegba o kpe ri oni ungmehi nga obo.

³ Ini o fe khia khi eghuo o ẹa mhue irudunga? Eri umha mhue irudunga oyewe o ya lie khi Ẹshinegba o a ke ze ri egbe e nga?

⁴ Iiye e! Ini oḡbọkpa o tseku khi oloegbhue, igesikia Ẹshinegba o khi. Abi Ebe-no-pfuase o ngme, ni o o.*

“A mema me khi
yeye u te ode ini u ngme,
ali khi u ya mu o le
ini a gue e ezọ.”

⁵ Ama ini umha gue e ngeli oyawa o ri ipfuase oyi Ẹshinegba khasẹ gboo, seẹ awa ke fe ya ngme? Eri awa ya lie khi Ẹshinegba o gbe awa azeba ini o na awa osoli to onobe ni awa li? Eri mhi la ana ngme abi oḡbọ o lie ngme.

⁶ Emini a so shi ona khi, Iiye o, ini o khia khi Ẹshinegba o o gbe azeba lo, se o kha li dobe gue agbo ezọ?

⁷ Ẹgbọ eghuo e ya ke khako, ee li, “Ini o khia khi eḡbholi ni mhi lo o ri ize-ri-egbenga oyi Ẹshinegba khasẹ, ni o khi ma ufumhi oyoli, se a ke gbo lie pfa ezọ mu mhe abi oḡbọ ona olamhe?”

⁸ Elo o ke ze ni awa a ro lie khi o tine ni awa ke li ingmobe ni onete o rote o lasele? A ya gue oḡbọgbọ eni e ngme na ezọ. Ezeze abi ẹgbọ eghuo e she kpe

* 3:4 Li ze *Iwolo 51.4*

li kięno ęgbhọli ma mhe khi emini mhia sese ęgbọ
ghọ.

Aa me ọni ọ guę ę ngeli

⁹ Ini a fe bino ọ bie, eri awa iJu awa fe ti dose
iJeta? Iiye o! Mhi she kpe roli khasę khi ęgbọ iJu
ali ęgbọ iJeta nya elemhi olamhe awa la a kia.

¹⁰ Abi Ebe-no-pfuase o ngme ni ọọ:

“Ogbokhoghwo ọa la ọ
ni ọ guę ę ngeli, ọgbọ aa me,

¹¹ Aa me ọni ọ mhue ilese,
wekhi eri ọgbokhoghwo
ọọ ga Eshinegba.

¹² Egbọ nya e she sọ
ukhokho gbe Eshinegba.

Wewe nya e she rote
ode oboese ni ọa ti.

Ogbokhoghwo ọa la ni
ọọ riele onete,

ọgbọ aa me ọghuo kpe!”†

¹³ “Eri ukokoluoluọ oyewe
o li abi uji ni o

khueghie-a shi eke.

Eri ẹlemhi oyewe

O ri udimhi ę pfi itsee.”‡

“Osue ęnye afue o la we unu.”

¹⁴ “Inu eyewe o vọ

itse ebe ikuku ali oyala.”§

¹⁵ “Ọa ya mu we unu

ni e rọ gbe ugbeli,

¹⁶ epfua ali oyese ę ę pfi

† 3:12 Li ze *Iwolo* 14.1-3; 53.1-3

‡ 3:13 Li ze *Iwolo* 5.9; 140.3

§ 3:14 Li ze *Iwolo* 10.7

shi obini e je kpa,

17 Ēa l̄ēs̄ē abi a līē la opfomh̄ē.”*

18 “W̄ekh̄i eri e m̄h̄oli
ekp̄ē na Ēshin̄ēgba.”†

19 Mena, awa l̄ēs̄ē khi emini a k̄ēk̄ē shi ushi nya, khi eni e deba ushi ̄ ngeli a k̄ēk̄ē ̄li na. Ni a r̄o bhale ya ̄ khi ̄gb̄o okh̄ogh̄uo ̄a ya līē khi emini o z̄ē ni lūē r̄o gbe ushi-a na, ini Ēshin̄ēgba ̄ gue agb̄o nya ̄z̄o.

20 ̄gb̄o ̄a la ̄ ni a ya pfa na khi ̄ pfuas̄ē irari khi ̄ ri ushi ̄ gbe akanya. Ochogh̄o eri ushi o z̄ē awa l̄ēs̄ē khi olamh̄ē o la ̄.‡

Igue-ngeli ni o r̄ote irudunga bhale

21 Ama Ēshin̄ēgba ̄ she ri od̄ē onogb̄o ni ̄ te pfa na awa khasē awa ni ̄a khi abi ushi o s̄ēs̄ē awa. Ni ebe Ushi ali emek̄ēguele e pfi ̄ts̄ēl̄ē shi.

22 Oni od̄ē onogb̄o ona ni Ēshin̄ēgba ̄ r̄o bhale, irudunga iJesu iKirisiti o te ̄ bhale deba eni e mie ̄li sūo nya. Ikhīōda ̄a la ̄ na eni e khi iJu ali iGiriki. §

23 Irari khi ̄gb̄okpa ̄ she lamh̄ē, ̄gb̄o e she nuata shi Ēshin̄ēgba ni ̄ō tsumhi ̄.

24 Ama afūē afūē ̄ ri okhale oȳoli pfa na awa khi awa pfuas̄ē, r̄ote ipfashekē ni o te ob̄o oyi iJesu iKirisiti bhale.

25-26 Eri Ēshin̄ēgba ̄ ri iKirisiti khasē agb̄o nya, khi l̄oli ̄ khi ̄ni ̄ dōb̄ē ya ri olamh̄ē topfa agb̄o, abi ̄ li ku ̄lia eȳoli kua ukhomhi apfida. Awa kha regbenga emini iKirisiti ̄ rīl̄ē, awa m̄h̄oli ipfashekē ni o r̄o r̄okhasē khi Ēshin̄ēgba ̄a ya gbe

* **3:17** Li z̄ē Aza 59.7-8 † **3:18** Li z̄ē Iwolo 36.1 ‡ **3:20** Li z̄ē Iwolo 143.2; iGal 2.16 § **3:22** Li z̄ē iGal 2.16

azẹba. Itobọ khi Ẹshinẹgba ọ mholi irabomudu ali khi ọa ya gbe azẹba, ọ rọọ gbe olamhẹ kua na ẹgbọ, ọ guele khi ọgbọkpa ni ọ ri udu nga iJesu, khi ọni a pfa na ọ khi.

²⁷ Elo awa ke tonu obọ udu ẹ shi? Afue! Elo o ze ona? Itobọ khi awa ma rọ ri ushi a gbe lo? Iiye o, ama itobọ khi awa miesuo.

²⁸ Irari khi awa zoli ukhomhi khi eri Ẹshinẹgba ọọ pfa na ẹgbọ ni e mhue irudunga ni ọa khi irari iri-ushi-gbe akanya.

²⁹ Ẹshinẹgba oyi ẹgbọ iJu tse ọ lese khi, ọa ke li khi Ẹshinẹgba oyi ẹgbọ iJeta? Oyewe ọ khi gueguegue.

³⁰ Ẹshinẹgba oghuo ọ khi, ọni ọọ pfa na ẹgbọ eni e shele-a rọte irudunga oyewe ali eni aa shele-a rọte oni irudunga oghuo.*

³¹ Eri ona o ke lie khi itobọ irudunga oyawa, khi awa a ke mhue emini awa ri ushi ẹ li? Iiye e. Ochoghọ awa kie mu ushi mhue.

4

Irudunga o ri Aburaamu migha shi ipfuase

¹ Se awa ke ya ngme shi ingme oyi Aburaamu ni ọ khi ititawa? Elo ọ fe me eni ingme ipfana rọte irudunga onana?

² Ini o khia khi ikanya ni Aburaamu ọ gbe a rọ pfa na li lo, ọ kha me emhi rọ ke tonu obọ udu, ama ọa khi odalo oyi Ẹshinẹgba.

³ Eri Ebe-no-pfuase ọọ, “Eri Aburaamu ọ mie Ẹshinẹgba suo, lolu a rọ leli ọli na li shi ipfuase.”*

* **3:30** Li ze iDeut 6.4; iGal 3.20

* **4:3** Li ze Igbae 15.6; iGal 3.6

⁴ Ini ọgbọ gbe akanya, ọgbọ ọa ya liẹ khi ifata ni ọ mie khi isomhopfa lọ, ama eri ọ gbe akanya shi ọ.

⁵ Ama ọgbọ ni ọa ri egbe da ikanya obọ oyọli ni ọ gbe, ni ọ regbenga Eshinẹgba ni ọọ pfa na ọna ọkhọlọ, oni irudunga ni ọ mhọli eghọ a deba guele khi ọ pfuase.

⁶ Abi iDefidi ọ rọ ngme nga ikhivọse oyi ọni Eshinẹgba ọ pfa na, ni ọa khi itobọ ikanya obọ oyi lọlighuo, ọ mu ma ingme ena, abi ọ reẹ,

⁷ “Oghẹlẹ o khi na ẹgbọ
ni Ọnọmhue ọ gbe
umha guẹli oyewẹ kua,
ni a ri olamhẹ oyewẹ
topfa wẹ.

⁸ Oghẹlẹ o khi na ọgbọ
ni Ọnọmhue ọa keke
olamhẹ eyọli shi na li.”†

⁹ Oni ikhivọse ona, ẹgbọ ni a shẹlẹ-a e lẹsẹ mhọli ọli? Abi khi ẹgbọ ni aa shẹlẹ-a e li mhọli ọli? Awa kie kpe ẹ ngme ọli khi irudunga ni Aburaamu ọ mhue, lẹli a rọ guele khi ọ pfuase.

¹⁰ Eghẹghẹ onoghuo a rọ leli ọli na li? Abi a rọ shẹlẹ ọli-a se lọ, abi khi neni a shẹlẹ ọli-a? Ọa khi abi a rọ shẹlẹ ọli-a se, ama abi aa rọ shẹlẹ ọli-a ne lọ.

¹¹ Itobọ khi ọ mhọli irudunga, Eshinẹgba ọ rọ pfa na li khi ọ mhọli ipfuase neni ọ shẹlẹ-a. Irarighọ, ọ rọ khi ita oyi ẹgbọ nya ni e miesuo, ini aa tseku shẹlẹ wẹ-a. Eghẹghẹ aghọ ni e khi eni a pfa na khi e pfuase.‡

† 4:8 Li zẹ *Iwolo* 32.2 ‡ 4:11 Li zẹ *Igbae* 17.10

12 Ita oyi ẹgbọ eni e sheḷe-a ọ li khi. Aa khi itobọ khi a sheḷe we-a tṣe, ama irari khi e deba ẹte-awe agbọ irudunga nabi itawa Aburaamu, neni a sheḷe ọli-a.

Irudunga a te a mie ishobọ eyi Ẹshinẹgba

13 Ọa khi iri ushi gbe akanya Aburaamu ali imimi ọli e te mie oni ishobọ khi lọli ọ ya le ugu agbọ nya, ama rọte angeli ipfuase ni o rọte irudunga bhale oyọli lo. §

14 Irari khi ini eni e ri ushi gbe akanya e le oni ugu lo, irudunga ọa kha ke mu ẹloe, oni ishobọ o mele afue-a.*

15 Eri ushi o ri ofu oyi Ẹshinẹgba bhale, irari khi ini ushi ọa la ọ, igbushi-a ọa kha la ọ.

16 Irarigho, oni ishobọ, irudunga o te ẹ bhale, ishegho ni o khi oyi okhale, ali ni o migha na imimi Aburaamu. Ọa khi oyi ẹgbọ ni e ri ushi ẹ gbe akanya tṣe, ama li shi oyi eni e miesuọ abi Aburaamu. Irari khi Aburaamu ọ khi ita awa nya elemhi ayemhe. †

17 Abi Ebe-no-pfuase o ngme ni ọọ, “Mhi she re mele ita ọyi ushishi ebubu-a.” Irudunga ni Aburaamu ọ mhue Ẹshinẹgba ọ rọ shobọ na li. Ẹshinẹgba ni ọọ ri eni e ghu-a guale bhale agbọ, ni ọ ma emhi enegbọ. ‡

18 Eri Aburaamu ọ miesuọ, ọ mhue irudushi, abi ọa rọ tseku me emini ọ ri udu shi ne, itobọ igho ọ rọ khi, “Ita ishishi ebubu.” Abi a kie kpẹ li gue ọli ye ọli khi, “Imimie e ya bu abi ikpetata.” §

§ 4:13 Li zẹ Igbae 17.4-6; 22.17-18; iGal 3.29 * 4:14 Li zẹ iGal 3.18

† 4:16 Li zẹ iGal 3.7 ‡ 4:17 Li zẹ Igbae 17.5 § 4:18 Li zẹ Igbae 15.5

19 Oa tigbe loşe Aburaamu shi irudunga oyoli, aboriękhia khi o she gbe ikpe egbhueshe, ni o gbo leşe khi loşi she womhe ramhi eghuli ali khi iSera ughuoli o she li womhe doşe ni o ke doşe ya bia eniye.*

20 Irudunga oyoli oa mhue olosemhe wekhi eri o khokho udu shi emini Eshinegba o ngme. Oni irudunga oyoli o ri itoto na li, o kuęghie Eshinegba.

21 Eri o lama shi o egbegbo khi Eshinegba o ya doşe rieleş emini o shobo na luę.

22 Loli o ze khi, "A pfa na li khi o pfuase."

23 Ungmemhi khi, "A leli oli na li shi angeli ipfuase," oa khi lolighuo tşe a keķe oli na.

24 Ama a li keķe oli na awa, eni Eshinegba o lie leli angeli ipfuase na, ni awa mie oli suo ikhi loşi ni o rote eghuli guise iJesu Onomhue oyawa le.

25 Eri Eshinegba o rue oli obo-a ni o ghu-a shi ingmobe eyawa. O guise oli le bhale agbo ni o khuęşe awa pfuase.†

5

Opfomhe ali Oghelę

1 Irarigho, aborokhia khi a she pfa na awa egho khi awa pfuase rote irudunga oyawa, awa she mhue opfomhe odalo oyi Eshinegba rote obo oyi iJesu iKirisiti Onomhue oyawa.

2 Loli awa rote obo oyoli mholi ode lo isomhelemhi oyi Eshinegba, te irudunga ni awa migha nga memena. Awa ke gheleş shi irudushi oyi ufumhi oyi Eshinegba.

* 4:19 Li ze Igbae 17.17 † 4:25 Li ze Aza 53.4-5

³ Oa khi igho tse, ama awa lie ghele shi osoli oyawa, irari khi awa lese khi eri osoli oo sese ogbo iregbemie.

⁴ Iregbemie o ri ogbo o mhuẹ egbegbi angeli, egbegbi angeli o ri ogbo o mhuẹ irudushi.

⁵ Oni irudushi ona, oa ya ze awa me omama. Irari khi Eshinegba o she tutu inono oyoli ku awa udu rote Ayemhe-no-pfuase, ni o ro na awa.

⁶ Irari khi eghẹghẹ ni awa aa ro mholi ekpabo ni awa ro khi ena olamhe, iKirisiti o bhale ya ghu-a na awa.

⁷ O ma munu ni ogbo o ro ghu-a na ogbo ni o gue ẹ ngeli, otse ogbo o ya roshẹka ni lue ghu-a na ogbo onete.

⁸ Ama eri Eshinegba o ri inono ni o mholi na awa khase. Lori o ze khi eghẹghẹ ni awa ro kie khi ena olamhe, iKirisiti o ro bhale ya ghu-a na awa.

⁹ Aborokhia khi a she rote oia eyoli pfa na awa mena, see oa lie tsumhi awa ofu oyi Eshinegba!

¹⁰ Irari khi ini eghẹghẹ ni awa ro khi ebe Eshinegba khi a rote eghuli ni omioli o ghu ri awa nu oli mhuẹ irọ-riẹle, see awa ni a she ro nu Eshinegba somhi awa aa li gbo ya rote agbo oyoli mhuẹ imiepfuese!

¹¹ Oa khi igho tse, ama awa li mholi oghẹle ayi Eshinegba rote iJesu iKirisiti Onomhuẹ oyawa, oni awa rote obọ oyoli mhuẹ irọsomhi.

Adamu o ri eghuli bhale, iKirisiti o ri agbo bhale

¹² Olamhe ni Adamu o lamhe o ri eghuli lo agbo le. Olamhe oyoli o ze khi ogbokpa o khi ona olamhe, irarigho ogbokpa o ro ya ghua.*

* 5:12 Li ze Igbae 3.6

¹³ Irari khi neni a ri ushi bhale olamhẹ, ọ she kpẹ lo agbọ le, ama ashini ushi ọa la, aa ya leli olamhẹ na ọgbọkhọghuo.

¹⁴ Aboriẹkhi ighọ, eri eghuli o kie rọte egheghe oyi Adamu gbe egbọ ya ramhi egheghe oyi iMosisi, li shi egbọ ni ẹa gbe ushi-a abi Adamu ọ li da omhese oyi Eshinegba. Adamu ọ khi irọkhọkhọ oyi oni ọ ya bhale.

¹⁵ Ama wẹwẹ aava ẹa li abeghuo irari khi isomhopfa onayi Eshinegba ọa li abi olamhẹ oyi Adamu. Igesikia o khi, khi ebubu egbọ e ghu-a irari olamhẹ oyi ọgbọghuo ọghọ. Ama okhale oyi Eshinegba o funẹ. Ighọ khi isomhopfa ni ọ rọ na ebubu egbọ rọte isomhelemhi oyi ọgbọ ọghuo, ikhi iJesu iKirisiti.

¹⁶ Ikhioda o la isomhopfa oyi Eshinegba ali olamhẹ oyi Adamu. Oni olamhẹ ọghuo ọghọ o ri ina-osoli bhale. Ama isomhopfa oyi Eshinegba o ri ipfana bhale ghi awa aboriẹkhia khi eni e lamhẹ awa khi.

¹⁷ Igesikia o khi, khi rọte olamhẹ oyi ọgbọ ọghuo, eghuli o te bhale agbọ. Ama emini ọgbọ ọghuo ọ riẹlẹ, ikhi iJesu iKirisiti, o funẹ. Egbọ nya ni e mie okhale oniẹmhi ali isomhopfa afuẹ afuẹ oyi ipfuase oyi Eshinegba, e ya mu olamhẹ ọ le, rọte obo oyi iKirisiti.

¹⁸ Abi olamhẹ oyi Adamu o li ri ina-osoli ghi egbọkpa, ighọ ipfuase ọghuo oyi iKirisiti o li ri ipfana ali isomhopfa agbọ oyi Eshinegba na ọgbọkpa.

¹⁹ Irari khi, abi umha-sueso oyi ọgbọ ọghuo o ri egbọ nya khi ena olamhẹ, ighọ a li ya pfa na ebubu egbọ shi ode oyi Eshinegba irari issueso oyi ọgbọ ọghuo.

20 Eri ushi o bhale ni egbo lese ashini e khi ena olamhe ramhi, ama abibi olamhe e tseku li bu, ilelemhi oyi Eshinegba o bu dose we.

21 Eghenge agho ni a bhale ya e khi ezeze abi olamhe o ri eghuli bhale, okhale oyi Eshinegba o ri ipfuase leghie, o ri agbo na agboagbo bhale, rote obo oyi iJesu iKirisiti Onomhue oyawa.

6

Ghu pfa Olamhe, u nu iKirisiti la agbo

1 Se awa ya ngme mena, eri awa ya ke li ingmobe le tse ni okhale oyi Eshinegba o ke bua shi o dose agho?

2 Iiye o! Awa ni idiegbe oyawa o ghu pfa olamhe, se awa ke gbo lie ke lamhe?

3 Abi khi aa lese khi awa nya ni a batazi shi iJesu iKirisiti, khi eri awa batazi shi eghuli oyoli?

4 Irarigho, eri a ri awa nu oli to abi a ro so awa oke batazi awa shi eghuli oyoli, ni a bhale ya e khi abi a li rote eghuli guise iKirisiti le rote ufumhi oyi Ita, ni awa li mholi agbo onogbo.*

5 Abi a ro ku awa ali loli gbe she eghuli oyoli egho, igho a gbo lie ku awa ali loli gbe shi iguisele oyoli.

6 Awa lese ona khi idiegbe oyawa onodiho khi eri o nu iJesu ghu-a shi apfida, ni a ro bhale ya e khi idiegbe olamhe oyawa o mele afue-a. Ini awa khi ke gbo khi ighumha olamhe.

7 Itobo khi ini ogbo o ghu-a, o she pfue ekpabo olamhe.

* 6:4 Li ze iKolo 2.12

⁸ Mena, ini awa she nu iKirisiti ghua, awa miesuo khi awa ya li nu ọli la agbo.

⁹ Irari khi awa leşe khi abi a she rote eghuli guise iKirisiti le egho, ọa ke gbo ya ghu ghue, eghuli ọa ke gbo mholi ekpabo shi ọli egbe.

¹⁰ Eghuli ni o ghu, utoghuokpe o ghu ọli ro mu ekpabo eyi olamhe o le. Agbo ni o la, o la o na Eshinegba.

¹¹ A li ligho leli egbe e shi eni e ghu pfa olamhe, ama a la agbo na Eshinegba elemhi iJesu iKirisiti.

¹² Irarigho, a khi ze ni olamhe o le eghie shi e egbe ni a ri oghuemhe ebe eyoli ke gbe akanya.

¹³ A khi ri ukiekie idiegbe okhoghuo oye e na olamhe, wekhi eri u re we shi eke shi akanya okholo, ochogho, a ri egbe e na Eshinegba abi eni a she rote eghuli nyene bhale agbo, ama a ri idiegbe oye e na li abi itsua ipfuase.

¹⁴ Irari khi olamhe ọa ke ya khi ọga oye e, itobo khi ushi ọa ke e ke mhes e na e, ama elemhi okhale oyi Eshinegba a ke la.

Ighumha eyi angeli ipfuase a ke khi

¹⁵ Se o ke li mena? Awa ke lamhe itobo khi ushi ọa ke mhes e na awa, se ni okhale oyi Eshinegba? Iiye o!

¹⁶ Aa leşe khi oghumha oyi emini a suo eso o na a khi? U dobe ya khi oghumha oyi olamhe ni o ri eghuli e bhale, u gbo dobe e ze issueso na Eshinegba ni o ri ogo o bhale angeli ipfuase.

¹⁷ Ama awa tse Eshinegba uwegbe, irari khi egheghe ni o dose, a kpe khi ighumha eyi olamhe, egheghe agho a ga ri udu oye e nya a suo eso na ose e ni a se e e.

18 A she pfuluse ẹ olamhẹ, ama ighumha eyi Ẹshinẹgba a ke khi, ni a ke riẹlẹ emini o ghọle Ẹshinẹgba.

19 Eri mhi ngme ona abi ogbo liẹ ngme, itobo khi aa lolo toto. Abi a kpẹ li ri idiegbe eye ẹ shi ighumha na ikanya ichimhi ali okhọlọ, a li ligho ri egbe ẹ shi ighumha angeli ni o ghọle Ẹshinẹgba, ni o ri ipfuaşẹ ẹ bhale.

20 Abi a rọ khi ighumha olamhẹ, aa mhue emini a ri angeli ni o ghọle Ẹshinẹgba riẹlẹ.

21 Ighe eleli ni a mhue oni eghẹghẹ shi ikanya ni e ke tigbe ri omama a mu ẹ ena? Emhi eghoghọ eghuli ẹẹ pfi.

22 Ama mena ni a she rọte olamhẹ pfuluse ẹ, ni a ke rọ khi ighumha eyi Ẹshinẹgba egho, eleli ni a khişẹ, ipfuaşẹ o rẹ ẹ ya khue pfuluse, o ri agbo na agboagbo o na ẹ.

23 Irari khi ifata oyi olamhẹ khi eghuli lo, ama isomhopfa oyi Ẹshinẹgba agbo na agboagbo lo rọte obọ oyi iJesu iKirisiti Onomhue oyawa.

7

Abi a liẹ ngeli elemhi ughue

1 A lẹşẹ inyoghuo, khi eri mhi nu ẹ ngme abi egho ni e lẹşẹ ushi, khi ushi o mhọli ekpabo shi ogbo egbe ini oni ogbo o kie da la agbo ne.

2 Ẹzeze abi ushi o ngme khi okpotso ni o la ughue o a gbudu vu odọ li obọ ini oni omose o kie da la agbo ne, ama khi ini o ghu-a oni ushi o a ke mu o li.

3 Irarigho, ini o vu ya ngeli na omose o lẹşẹ, abi odọli o li kie la agbo egho, a ya lu o li okiokia. Ama

ini ọdọ li ọ ghua, oni ushi ogho ọa ke mu ọli, ọa ke khi ọkiokia, ini ọ tseku ngeli na ọmọse ọlese.

⁴ Igho o li khi shi e ọ inyoghuo-mhe. Idiegbe oyi iKirisiti a ke khi, ee a she li ghu-a pfa ekpabo oyi ushi. A she ga li mholi eghẹghẹ ni a ro mele oyi ọgboese-a, ikhi oni a rote eghuli guise le, ni a me asha ke gbe akanya enete na Eshinegba.

⁵ Irari khi abi idiegbe olamhe o ro ọ mhesẹ na awa, igho oghuemhe oyi olamhe ni ushi o zese-a o la awa idiegbe gbe akanya, ena e ri awa ngeli angeli ni ọọ pfi eghuli.

⁶ Ama mena, abi awa ro she ghu pfa emini e ke kpe genọ awa egho, a she pfuese awa obọ oyi ushi, ni awa me asha rote ode onogbo oyi Ayemhe ke ga, ni ọa ke khi ode oyi ushi ni a keke.

Inu-olamhe khe abo

⁷ Se awa ke ya ngme mena? Olamhe oni ushi o ke khi sho? Iiye o. Egbegbo lo khi, mhi aa kha lese emini olamhe o khi, ini ọa khi ushi lo. Irari khi mhi aa kha lese emini ivie shi emhi ọgbọ o khi ini ushi ọa lie, “Khi vie shi emhi ọgbọ.”*

⁸ Rote oni ushi ogho, olamhe o te me asha guise iwali oghuemhe ukphe nya ni e la mhe egbe le. Ini a rue ushi ode-a eri olamhe o ghua.

⁹ Eri mhi kpe la agbo tse abi mhi aa ro lese ushi ne, ama abi ushi o ke ro bhale, olamhe o gbo bhale agbo, lolu mhi ro ghua.

¹⁰ Mhi me khi ushi ni o kha ri agbo bhale, khi eghuli o ro bhe.

* **7:7** Li ze Okiali 20.17; iDeut 5.21

11 Olamhẹ o mẹ asha migha rọte ushi di mhẹ. Rọte oni ushi, eghuli o gbe mhẹ.†

12 Abokieli khi, oni ushi o pfuase, omhese o pfuase, e migha, e ti.

13 Eri emini o ti ogho o ke ri eghuli ghi mhẹ egho? Iiye o! Ama ni a ro lese olamhẹ shi olamhẹ o ro pfi eghuli na mhẹ, rọte emini o ti, ni a bhale ya e khi rọte oni ushi, olamhẹ o mema khi olamhẹ egbegbo.

14 Irari khi awa lese khi ushi emhi Ayemhẹ o khi, ama mhemhẹ ogbo tse, mhi khi oni a ro na olamhẹ de.

15 Mhi aa lese emini e li mhẹ, irari khi emini mhia nono ni mhi ke riye, mhi aa dobe riye oli. Ama emini o a ghole mhẹ, mhia riye.‡

16 Ini mhi riye emini mhi aa nono ni mhi riye, mhi lama shi o khi ushi o ti.

17 Abi oli khi, o a ke khi mhemhẹ mhia riye oli ama olamhẹ ni o la mhẹ egbe lo.

18 Mhi lese khi emhikhoghwo ni o ti o a lamhẹ egbe, ikhi idiegbe olamhẹ oyemhẹ. Irari khi ini o tseku ghole mhẹ ni mhi riye emini o ti, mhia dobe e riye oli.

19 Irari khi emini mhia riye o a khi emini o ti ni mhia nono ni mhi riye, ochoghwo onobe ni mhi aa nono ni mhi riye, mhi kiele e riye.

20 Mena, ini mhia riye emini mhi aa nono ni mhi riye, ona o rokhase khi o a khi mhemhẹ mhi riye oli, olamhẹ ni o la gbọ oyemhẹ oo riye oli.

21 Ina o ga limhẹ egbe eghẹghẹkpa. Ini mhia nono ni mhi riye onete, onobe o nu mhẹ la agho.

† 7:11 Li ze *Igbae* 3.13 ‡ 7:15 Li ze *iGal* 5.17

22 Irari khi ekelemhi udu oyemhe, ushi oyi Eshinegba o te e ghole mhe.

23 Ama mhi me khi ushi olese o la mhe egbe e gbe akanya, ni o mu okholi vule shi ushi ni o la mhe udu o, o remhe mele oghumha ushi oyi olamhe-a, ni o la mhe egbe a gbe akanya.

24 Ogbọ umeobinuje nabise mhi fe khi ena. Oghuo o ya tsumhi mhe idiegbe eghuli ona lasele?

25 Mhi kphemhi na Eshinegba rote obọ oyi iJesu iKirisiti Onomhue oyawa.

Irarigho, mhemhe oyemhe, oghumha oyi ushi oyi Eshinegba mhi khi udu oyemhe, elemhi idiegbe olamhe, mhi khi oghumha oyi ushi olamhe.

8

Angeli na Ayemhe

1 Irarigho, ipfezo-mu o ke la o na egbo ne mie iJesu iKirisiti suo, ni ea ke ngeli rote ode olamhe, ama eni ee ngeli rote ode Ayemhe-no-pfuase.

2 Ayemhe ni o ri agbo a na awa itobo khi awa mie iJesu iKirisiti suo, o she taghie mhe obọ oyi ushi olamhe ali eghuli-a.

3 Emini Ushi oyi iMosisi o do be rie le irari khi idiegbe olamhe o mie o li ekpabo, Eshinegba lolighuo o ke ya pfuese awa abi o ghie Omi o li, ni o li abi awa egbo olamhe ali ni o ya khi iluasobo shi olamhe eyawa. Oni idiegbe ogbo ni oni iKirisiti o ze o ro pfueche olamhe-a shi idiegbe ogbo olamhe.

4 Eri Eshinegba o rie le ona ni ipfuase ni ushi oo nono ni awa mholi o tse shi awa egbe, ini awa khi ke ngeli te ode olamhe, ama ni awa ke ngeli rote ode Ayemhe.

⁵ Ẹgbọ ni ẹ ngeli rọte ode olamhẹ, eri e ri udu shi emini idiegbe oyẹwe ọọ nono. Eri ẹgbọ ni ẹ ngeli rọte ode Ayẹmhẹ, e ri udu shi emini Ayẹmhẹ ọọ nono.

⁶ Irari khi udu oyi ọgbọ eghuli o tsua. Ama udu ọ riẹlẹ emini Ayẹmhẹ ọ gueye ọli, eri ọ ya la agbọ ọ mhue ofomhẹ.

⁷ Ọbe Ẹshinẹgba ọgbọ ọọ khi, ini udu olamhẹ oyọli ọọ mhese na li, irari khi ọa ya suọ esọ na Ẹshinẹgba. Irari khi ọa ze ni ushi oyi Ẹshinẹgba o mhese ke na li, wẹkhi eri ọ tigbe ya lama ghue ni ọ mhese na li.

⁸ Ẹgbọ ni idiegbe olamhẹ oyẹwe o mhese ẹ na, ẹa dobe riẹlẹ emini o ghọle Ẹshinẹgba.

⁹ Yeye oye idiegbe olamhẹ ọa ke mhese ẹ ne ama Ayẹmhẹ o ke mhese ẹ ne, ini Ayẹmhẹ oyi Ẹshinẹgba o da la agbọ oye ne. Ọgbọ ni ọa da mhue Ayẹmhẹ oyi iKirisiti ne, ọa khi ọnayọli.

¹⁰ Eri-tse khi ini iKirisiti ọ da la agbọ oye ne, idiegbe oye o fu pfa olamhẹ, ayẹmhẹ oye o kie la agbọ irari ipfuase ni awa rọte obọ oyi iKirisiti mhue.

¹¹ Ini Ayẹmhẹ oyi ọni ọ rọte eghuli guise iJesu le o da la agbọ oye ne, lọli ni ọ rọte eghuli guise iJesu le ọ ya rọte Ayẹmhẹ oyọli ni o la agbọ oye ri agbọ na idiegbe ni ọọ ghu oye.*

¹² Irarigho, inyoghuo-mhẹ, awa mema ya ke ngeli abi ayẹmhẹ Ẹshinẹgba o gueye awa. Awa khi ke ngeli abi o ghọle idiegbe olamhẹ.

¹³ Irari khi, ini u wa ngeli abi idiegbe olamhẹ o gueye, eri u ya ghu-a, ama ini u wa ngeli abi Ayẹmhẹ o gueye, eri u wa gbe ekpabọ olamhẹ a shi idiegbe oye, u la agbọ.

* **8:11** Li ze 1 iKori 3.16

14 Egbọ ni Ayemhẹ oyi Eshinegba ọ mhẹse ẹ na imi Eshinegba e khi.

15 Irari khi Ayemhẹ ni Eshinegba ọ rọ nẹ, ọa khi oni o gbolo rẹ khi oghumha ulishi, ama Ayemhẹ ni ọ rọ rẹ khi Omọ oyọli u mie. Oni Ayemhẹ ọ ri awa mhue itoto ẹ vie lu Eshinegba, awa lu ọli Itamhẹ, Itamhẹ.†

16 Oni Ayemhẹ lolighuo ọ pfi ọtsele shi ayemhẹ oyawa khi eniye eyi Eshinegba awa khi.

17 Ayemhẹ oyọli ọ ze ni awa lese khi awa ya nu iKirisiti mhọli okemhi shi emini Eshinegba ọ rọ shobọ khi lọli ya riele. Eghẹghẹ aghọ awa nu iJesu mhọli okemhi ufumhi oyọli ini awa li me osoli.‡

Ufumhi na ogbenako

18 Mhi me ọli me khi osoli ni awa a me memena khi ọa khi oni a rọ khọkhọ emini a rọ ya khase elemhi agbọ oyawa ikpukhokho.

19 Irari khi eri emini Eshinegba ọ ma nya e ri ikphakpha-egbe migha khe eghẹghẹ ni Eshinegba ọ rọ ya ri eni e khi egbegbi imiọli khase.

20 Irari khi emini a ma nya, a rọ mele afue-a, ni ọa khi oghumhẹ oyewe, ama abi o li ghole oni Eshinegba lo, ni ọ rewe mele afue-a, elemhi irudushi,§

21 khi ọ ya tsumhi emini ọ ma nya ini e khi ke ke-a ali khi e ya nu imi Eshinegba kemhi epfua ni o mhọli ufumhi.

22 Awa lese khi emini a ma nya e kiele ẹ lomhẹ memena e la ọtomhẹ, abi ọkpotoso ni oku ọọ to.

† 8:15 Li ze iMak 14.36; iGal 4.6 ‡ 8:17 Li ze iGal 4.5-7 § 8:20 Li ze Igbae 3.17-19

23 Oa khi emini a ma wẹwẹghuo tse, ama li shi awa ni awa mie Ayemhe-nọ-pfuase ni o khi igbaekele agbo onogbo oyi Eshinegba. Awa lie lomhe abi awa li ri eloe shi eke e khe ogbele ni Eshinegba o ya la ukpeloe ogbokpa guele khi imi Eshinegba awa khi ali ni a ro ya pfa awa ike-a shi eke.*

24 Irari khi rote irudushi ona a te mie awa pfuese. Eri-tse khi irudushi ni aa me gboo o a fe khi irudushi. Oghuo o gbo ri eloe shi eke e khe emini o she me eloe ne?

25 Eri-tse khi ini awa ri udu shi emini awa aa me ne, irabomudu awa ro ke e khe oli.

26 Igho Ayemhe o lie kpaghie awa obo umhagbapfo oyawa, Irari khi awa aa lese abi a lie so iromhi, oni Ayemhe lolighuo o ri ilomhe e so iromhi na awa shi emini unu o a dobe e ngme.

27 Oni Eshinegba ni o o me elemhi udu oyi egbo, o lese usamhi eyi Ayemhe. Irari khi eri oni Ayemhe o so iromhi na egbo eyi Eshinegba abi o li de shi oghuemhe oyi Eshinegba.

28 Awa lese khi eri Eshinegba o o riele emhi nya te ode onete na egbo ni e nono ingme oyoli. Egbo ni o khia khi o lu shi omhese oyoli.

29 Eni Eshinegba o she kpe lese, wewe o ze o da ke ni e ya li abi Omi oli, ni oni Omi oli o khi onodode elemhi inyoghuo ebubu.

30 Igho eni Eshinegba o ze o da ke, wewe o li lu. Eni o lu, wewe o li pfa na, eni o pfa na wewe o li ro khi eni e mhuẹ ufumhi onabi oyoli.

31 Abi awa ke ro mhuẹ ena shi udu oyawa, se awa ke ya so shi ena mena? Ini Eshinegba o nu awa

* 8:23 Li ze 2 iKori 5.2-4

la, oghuo o ya dobe mu okhue vule shi awa o?

³² Loli ni o to ukphe Omi oli na awa, ni o roli luasobo na awa nya, see o ya pfo udu gbo ri emhi nya ma oni Omi oli na awa?

³³ Oghuo o ya gue ingme shi egbo ni Eshinegba o she ze egbe? Eshinegba lueghuo o pfa na ogbo.

³⁴ Oghuo o dobe pfa ez o mu ogbo? IJesu iKirisiti lueghuo lo, oni o ghua. O gbo dose agho, Oni a guise le bhale agbo, mena o shito obo ita oyi Eshinegba, o so iromhi e na awa.

³⁵ Oghuo o ke dobe ya vase awa rote inono ni iKirisiti o nono awa lasele? Osoli abi khi omunu abi okholi ni a mu vule shi awa o o ya dobe? Abi khi okiamhi abi khi umha me so lo, abi khi ini i igbe-a tsekha deba lo?

³⁶ Abi a li keke oli shi ebe-no-pfuase, khi,
 “Itobo oyee anye ro
 la okhena eghuli elekpa,
 a ri anye khokho
 isumha ni a ya gbolo a.”[†]

³⁷ Iiye, abi a ri me eni emhi enana nya, anye fu dose oni o kholi mu o le, rote obo oyi oni o nono ingme oyanye.

³⁸ Irari khi mhi me oli me khi emhikhoghuo o la agbo ona, eghuli wekhi agbo ilala, wekhi igeni wekhi iyemhe okphaghi e ali emini e la irarogbe e mheshe shi agbo ni awa la memena okekhi agbo ni o ke e bhale wekhi ekpabo,

³⁹ wekhi iyagha ali ilimhi, wekhi emhikhoghuo ni a ma, o dobe ya vase awa rote inono ni Eshinegba o nono awa rote iJesu oyawa lasele.

[†] **8:36** Li ze *Iwolo 44.22*

9

Uzẹmhi ni Ẹshinẹgba ọ zẹ ẹgbọ iZirẹni

¹ Egbegbi ingme mhia ngme itobọ khi ọnayi iKirisiti mhi khi. Ọa khi ẹgbhọli mhia lo. Udu oyẹmhe o pfi ọtsẹle shi ọ elemhi Ayẹmhe-nọ-pfuase,

² ini mhiẹ khi mhi mhọli oya ali udu ialamhe ni ọa mhue ukpese,

³ na ẹgbọ eyẹmhe ni anye khi ẹgbọ eghuo ali ọlia eghuo. Itobọ oyewe, eri mhia lie khi Ẹshinẹgba ọ kha pfi unu na mhe ali khi a kha rue mhe ikugbe ni mhi kugbe iKirisiti ọ le, ini loli rewe mhọli imiepfuese.

⁴ Wewe e khi imimi iZirẹni ni Ẹshinẹgba ọ zẹ, ni ọ rọ khi imi ọli, ọ ri ufumhi oyọli khasẹ we, ọ nu we riẹle ilama kugbe, ọ ri ushi oyọli na we. Wewe e mhọli egbegbi ugamhi, e she mie ishobọ oyi Ẹshinẹgba.*

⁵ Wewe e mhọli eni egbhali ena elele ni a suo eko, ni e gba ushishi Iburu eke le. Wewe e li khi itita iKirisiti. Ẹshinẹgba ni ọọ mhesẹ na emhikpa, ọ khi ọni áá kuẹghie agbọagbọ.

⁶ Mhi aa lie khi ishobọ ni Ẹshinẹgba ọ shi, khi, o fia kua. Irari khi ọa khi ẹgbọ ni e rọte iZirẹni lasese nya, e khi ẹgbọ eyi Ẹshinẹgba.

⁷ Wẹkhi imimi Aburaamu nya e khi egbegbi imi Aburaamu. Ẹshinẹgba ọ gueye Aburaamu khi, “Imimi Aziki a ya leli shi eni u bia.”†

⁸ Onana o guele khi eniye ni ọ bia elemhi ọghuẹmhe idiegbe nya ẹa khi imi Ẹshinẹgba. Ama

* **9:4** Li zẹ *Okiali 4.22* † **9:7** Li zẹ *Igbae 21.12*

eniye ni a bia rote ishobo onayi Eshinegba wewe a leli shi egbegbi imimi Aburaamu.

⁹ Irari khi ishobo onayi Eshinegba khi, “Egheghe ni o roshi eke o kha da ramhi ne, mhi ya ri ishobo oyemhe tse, iSera o bia omọ omose.”‡

¹⁰ Oa pfo ghọ. Irari khi itsema emose eyi iRebeka, ita oghuo o bia we ikhi Aziki itita awa.

¹¹⁻¹² Ogbọ a bia itsema ena ne wekhi eri e lese ingme e riele onete ali onobe ne, ni Eshinegba o ro she gueye inyewe iRebeka khi, “Onogbhali o ya ke ga onikeke.” Eri Eshinegba o riele ona rokhase khi, uzemhi ni loli e ze ogbo ni o khi emini o ya khi elemhi agbo, khi oa khi itobo akanya ni o gbe ama abi o ghole Eshinegba o li lu oli. §

¹³ Abi Ebe-no-pfuase o ngme ni oo, “IGiekopu mhi nono dose iSo.”*

¹⁴ Se awa ke ngme mena? Khi Eshinegba oo zolo? Iiye o, oa khi igho kpa!

¹⁵ Irari khi o gueye iMosisi oo li,
 “Mhi ya mholi ilelemhi na
 oni mhi ya mholi ilelemhi na,
 mhi vie osue na
 oni mhi ya vie osue na.”†

¹⁶ Itobo igho, oa khi abi o ghole ogbo wekhi emini ogbo o riele ama rote ilelemhi oyi Eshinegba.

¹⁷ Irari khi Ebe-no-pfuase o ngme na shi iFero egbe, oo li, “Itobo ona mhi ro re khi oghie ni mhi rote emini mhi ya li e ri ekpabo eyemhe khase, ni mhi ro ze agbo nya lese eva oyemhe.”‡

‡ 9:9 Li ze *Igbae* 18.10 § 9:11-12 Li ze *Igbae* 25.23 * 9:13 Li ze *iMala* 1.2-3 † 9:15 Li ze *Okiali* 33.19 ‡ 9:17 Li ze *Okiali* 9.16

18 Irarigho, eri Eshinegba o o mholi ilelemhi na oni o ghole oli, o zese oni o ghole oli udu-a.

19 U dobe ya mhila mhe ogbo ona, “Elo o ze ni Eshinegba o ro kiele e me umhagueli oyawa sho, aborokhia khi loli o ri awa ngeli abi o ghole oli? Irari khi ogbokhoghuo o dobe ya nu Eshinegba khe abo?”

20 Ama oghuo u khi, yeye ogbo ni gbudu ya mie Eshinegba unu? Emini a ma o dobe ya lie oni o ma li, “Elo o ze ni u ro lina ma mhe?”§

21 Omekhe o a fe mhue afu ni o ro ri eke eme e ma emini o ghole oli? O kha ma eghuo shi eni a ro riele emini e mu eloe, o manoelese shi ni a ro riele emini a me kpa.

22 Igho li khi emini Eshinegba o riele. Aboriekhia khi o mholi afu ni o kha ro ri ofu ali ekpabo oyoli khashe egbo ni e kha pfua, ni o me ofu oyewe egho, ama eri o kie mhue irabomudu na we.

23 Ilelemhi ni o mholi na egbo ni o ze, ikhi egbo ni e ya mholi okemhi ufumhi oyoli, o ro ri abi ufumhi oniemhi oyoli o li khashe.

24 Li shi awa, eni o li lu. Oa khi egbo iju tse ama shi egbo ifeta.

25 Abi o ngme shi ebe Osia ni o,
 “Egbo ni ea khi eyemhe,
 mhi ya lu we egbo eyemhe.
 Ushishi ni mhi aa
 nono ingme oyewe,
 mhi ya lu,
 ‘Egbo ni mhi nono.’ ”*

26 Ali khi,

§ 9:20 Li ze Aza 29.16; 45.9 * 9:25 Li ze Osia 2.23

“A ya mẹ khi,
ashini a ga la liẹ wẹ,
‘Aa khi ẹgbọ eyẹmhe,’
aghọ a gbo la lu wẹ,
‘Imi Ẹshinegba ni ọ la ọ.’ ”†

27 Azaya o ngme ingme
oyi iZireni lasele gboo, khi,
“Ini o tseku khia khi
ẹgbọ iZireni e bu abi ekhashe
ne la okẹ oniẹmhi,
ikuku ẹgbọ ọ a ya tsumhi.

28 Irari khi Ẹshinegba ọ ya
ri inyanya sọ ẹzọ oyọli
eke agbọ-a zeghele.”‡

29 Ezeze abi Azaya ọ kpẹ li ngme ọli khi:
“Ini Ẹshinegba ni ọ
mhẹse shi emhi nya
ọa keşẹ imi-imi le na awa lọ,
a kha li na awa osoli
abi ẹgbọ iSodomu,
a pfuse awa abi ẹgbọ iGomora.”§

Umha-miesuọ oyi ẹgbọ iZireni

30 Sẹ awa ke ya ngme? Khi ẹgbọ iJeta ni ẹa na khu
ipfuase, khi a pfa na rọte irudunga,

31 ama ẹgbọ iZireni ni e na khu ushi igue-ngeli, ẹa
kie te ọ?

32 Sẹ ọ li khi ighọ? Itobọ khi ẹa rọte irudunga na
khu ọli, ama e rọte ode ikanya khu ọli. E kholo awe
shi, “ẹche ọzuode.”

33 Abi Ebe-no-pfuase o ngme, ni ọọ, “Bino, mhi
tsua ẹche shi iZayo ni o ya ri ẹgbọ kholo awe. Ẹcheli

† 9:26 Li ze Osia 1.10 ‡ 9:28 Li ze Aza 10.22-23 § 9:29 Li ze
Aza 1.9

ni o ya re we de. Ama oni o da mie oli suo ne, o ya me omama.”*

10

¹ Inyoghwo-mhe, emini e ghole udu oyemhe ali olema ni mhia lema Eshinegba khi, ni a bhale ya e khi egbo iZireni eyemhe e khi eni a mie pfuese.

² Mhi pfi otsese shi o khi e mhue omuegbe shi ugamhi oyi Eshinegba. Ama egbegbi ileasingme o la omuegbe oyewe.

³ Aborokhia khi ea lese ipfuase ni o rote obo oyi Eshinegba bhale, ni e ro nono abi e li ya ri oyewe ko egho, eri ea ri egbe we na ipfuase oyi Eshinegba.

⁴ Irari khi iKirisiti o ri emini ushi o ngme nya gba pfo, ni o ze khi Eshinegba o pfa na ogbokpa ni o miesuo.

Imiepfuese, oyi ogbokpa lo

⁵ IMosisi o lina gue oli le emini ipfuase ushi o khi, ni o re, “Oni o da ri ushi nya gbe ne, o ya la agbo.”*

⁶ Ama eri ipfuase ni o rote irudunga bhale oo, “Khi la ekelemhi udu oye lie, ‘Oghuo o ya nga iloghie?’ ” (Ni o ya rue iKirisiti tiemhile.)

⁷ “Okekhi eri u we, ‘Oghuo o ya tiemhi ilimhi na ningolo?’ ” (Ni o ya rue iKirisiti rote eghuli ngale.)

⁸ Abi o ngme na: “Ungmemhi oyi Eshinegba o la mama e. O le unu, o le udu,” ikhi ungmehi irudunga ni anye ro o tse abo.†

⁹ Ini u ri unu oye e khi, “Ijesu o khi Onomhue,” ni u ro miesuo shi udu oye khi Eshinegba o rote eghuli guise oli le, a ya mie e pfuese.

* **9:33** Li ze Aza 28.16 * **10:5** Li ze iLev 18.5 † **10:8** Li ze iDeut 30.12-14

10 Irari khi udu ọgbọ ọ rọ miesuọ ni a rọ pfa na li, ali khi unu ọgbọ ọ rọ ngme lasele ni ọ rọ mhue imiepfuese.

11 Abi Ebe-no-pfuase o ngme, ni ọọ, “Ọnini ọ da regbenga li ne, ọa tigbe ya me omama.”‡

12 Ọgbọkpa ona o nu ngme, irari khi ikhioda ọa la shi ẹgbọ iJu ali ẹgbọ iJeta ọ. Eshinegba ọ ga khi Ọnọmhue oyi ẹgbọ nya, ọọ khivose egbegbọ na oni ọ da lu ọli.

13 Irari khi, “Ọnini ọ da lu eva oyi Ọnọmhue ọ ya khi oni a mie pfuese.”§

14 Ama se e li ya lu ọli ini ẹa mie ọli suọ? Se e li ya mie ọli suọ ini ẹa suọ oni ungmehi? Se e li ya suọ ini a ri oni ungmehi tsabo.

15 Se a li ya ri oni ungmehi tsabo ini ọgbọ a ghie eni ẹẹ tsabo fie lase? Abi Ebe-no-pfuase o ngme ọ khi, “Eri ibhale oyi ẹgbọ ni e tsua usomhi onete bhale o ri oghẹle bhale!”*

16 Ama ẹgbọ iZireni nya ẹa mie oni usomhi onete ona suọ. Azaya ọ liẹ, “Eshinegba, ọghuo ọ mie usomhi oyi anye suọ?†

17 Igho irudunga o li rọte ini ọgbọ ọ suọ oni usomhi ẹ bhale, ali khi usomhi oyi ingme iKirisiti iro-tse abọ a te ẹ suọ oni usomhi.

18 Ama mhi mhila, eri aa suọ oni usomhi? Eeli, e suọ.

“Uruli oyewe o she ramhi
ashakpa eke agbo,
ungmehi oyewe
o ramhi ukpese agbo.”‡

‡ 10:11 Li ze Aza 28.16 § 10:13 Li ze iJofe 2.32 * 10:15 Li ze Aza 52.7 † 10:16 Li ze Aza 53.1 ‡ 10:18 Li ze Iwolo 19.4

19 Mhi gbo mhila, Eri ọa lo ẹgbọ iZireni esọ? Odode IMosisi ọ lie,
 “Mhi ya ri ẹgbọ eyemhe
 ke kpe ofuma oyi ẹgbọ
 ni ẹa khi eyemhe ne,

Mhi ya re ẹ mhuẹ iyese elemhi-a
 deba ushishi ni ẹa leşe mhe ne.”§

20 Eri Azaya ọ ri igbeudu ngme ọli khi,
 “Egbọ ni ẹa roshẹka
 nono mhe e me mhe.

Mhi ri egbe mhe khase
 eni ẹa mhila ogbo mhe.”*

21 Ama abi ọ ngme shi
 ẹgbọ iZireni egbe khi,
 “Ogbele nya mhi nise obọ oyemhe-a
 na ẹgbọ ni ẹa ya suọ esọ,
 ni ẹa lama mu pfi.”†

11

Ikheremhi ẹgbọ iZireni ni e kpole

¹ Mhiẹ i. Eri Eshinegba ọ kie ẹgbọ eyi lolighuo? Iiye e! Mhemhe oyemhe ọngi iZireni mhi khi. Omi-omi Aburaamu, Mhi rote edeli oyi iBejami lasele.*

² Eshinegba ọa kie ẹgbọ eyoli ni ọ rote igbaekele ze. Waa leşe abi Ebe-no-pfuase o ngme shi ashini Elaja ọ ro sọ iromhi ri awọlo gueye Eshinegba emini ẹgbọ iZireni ẹ riẹle?

³ Ni ọ reẹ, “Eshinegba, e she gbolo emekeguele eye-a, e guoghọ itete eye-a. Mhemhe-ghuo kpele mhi ke kpole, e gbolo ẹ nono ni e gbe mhe-a.”†

§ 10:19 Li ze iDeut 32.21 * 10:20 Li ze Aza 65.1 † 10:21 Li ze Aza 65.2 * 11:1 Li ze iFili 3.5 † 11:3 Li ze 1 Ighie 19.10,14

4 Sẹ Ẹshinẹgba ọ sọ li? Eri ọọ Elaja, “Mhi kẹsẹ emọsẹ agbẹlẹ ishilua le ni ẹa lama nyẹsẹ ukhomhi na olitsa iBali.”‡

5 Igho o kie li khi memena. Itobo khi ẹgbọ iZireni e la ọ ni e kiele ẹ suọ esọ na Ẹshinẹgba irari okhale oyoli ni ọ rọ zẹ wẹ.

6 Ini oni uzemhi o khi itobo okhale, ọa ke khi itobo ikanya. Ini o khi irari ikanya lo, okhale ọa ke khi egbegbi okhale.

7 Elo a ke mẹ, Ẹgbọ iZireni ẹa mẹ emini e nono. Ikuku ẹgbọ ni Ẹshinẹgba ọ zẹ, wẹwẹ e mẹ emini e nono. Eni e kpole e le esọ shi ulumhi ni Ẹshinẹgba ọ lu wẹ,

8 Abi Ebe-no-pfuasẹ o ngme khi,
“Ẹshinẹgba o rẹ wẹ
lese-a ningolo.

Alo eyẹwẹ e zuse
ni ẹa zẹ wẹ mẹ eke,
ali esọ eyẹwẹ e zuse
ni ẹa zẹwẹ ke rọ ọ suọ esọ,
ramhi ogbe-namo.”§

9 IDefidi ọọ liẹ,
“Ẹshinẹgba ọ ka zẹ
ni akhe ni e nye,
e mu okhọli vule shi wẹ ọ.
Ni o rẹwẹ kholo awẹ,
ni o nasẹ wẹ.

10 Alo eyẹwẹ e ka zuse
ini e khi mẹ eke.
Ugugu oyẹwẹ o nyẹsẹ
abi ighumha, agboagbo.”*

‡ 11:4 Li zẹ 1 Ighie 19.18

§ 11:8 Li zẹ iDeut 29.4; Aza 29.10

* 11:10 Li zẹ Iwolo 69.22-23

Iguabọ ni a toma ọara

¹¹ Mhi gbo mhila, eri e kholo awẹ ini e de, ni ẹa ke doḅe ya vule? Iiye e! Ama itobọ olamhẹ ni e lamhẹ lọ. Imiepfuese o she bhale deba ẹgbọ iJeta, ini ẹgbọ iJu e ba ke kpe ofuma.

¹² Mena, ini o khia khi a khivọṣe na ẹgbọ iJeta itobọ khi ẹgbọ iJu ẹa lama mie imiepfuese ni Ẹshinegba ọ rọ ghi wẹ. Sa ọ ghue, abi ikhivọṣe ni agbọ nya e ya mhọli o ke bẹshi ya fu ramhi, ini eni ẹgbọ iJu e lama mie oni imiepfuese ikpukhokho.

¹³ Mena, ẹẹ ẹgbọ iJeta mhi nu ẹ ngme. Aborokhia khi eri Ẹshinegba ọ zẹ mhẹ mhi khi aghiusomhi na keẹ na ghie ghi ẹgbọ iJeta eghọ, eri akanya oyemhẹ o mu mhẹ egbe.

¹⁴ Eri mhia riẹlẹ ona ini mhi ri ẹgbọ iJu eyemhẹ ke kpe ofuma, isheghọ ni mhi doḅe tsumhi eghuo elemhi wẹ.

¹⁵ Ini ukiemhi ni a kie ẹgbọ iZireni o ri ẹgbọ na agbọ enekpọle nu Ẹshinegba rọ riẹlẹ, seẹ o ke bẹshi ya li ti ramhi, ini eni iZireni e ke mie oni Ẹshinegba suọ? Eri o ya li abine khi a rọte eghuli guise ọgbọ le.

¹⁶ Ini a ri ukiekie ibuleḅi onodode mele oni o pfuase-a irari khi a rọli ga Ẹshinegba, oni ibuleḅi nya oni o pfuase o ke khi. Ini imhili ọọra o pfuase oni ọọra nya o ya khi oni o pfuase.†

¹⁷ Ama eri ẹẹ ẹgbọ iJeta a li abi uguabọ ọọra olivu onokpo ni a khi gbọṣe shi idiegbe oyi egbegbi ọọra olivu ni a rọte eke kuẹlẹ vule. Eri ẹẹ a ke ya migha ashini iguabọ eni a rọte oni egbegbi ọọra olivu

† **11:16** Emini a ri onana ngme khi: Ini Aburaamu ali Aziki ali iGiekọpu ni e khi itititawa e da khi eni e pfuase, eni e pfuase awa imimi wẹ e li khi.

kanọ kua. Itobọ ona, ikhivọse ni e rọte imhili oni ọọra olivu ẹ lasele ẹẹ a ke rọ li agbọ.

¹⁸ Itobọ ighọ, a khi ri ẹloe gbe eni iguabọ ni a kanọ-a eghọ. Elo o rẹ ẹ ya ke vuse ike? Iguabọ tse a lese khi. Aa mu imhili mhue, imhili e mu ẹ mhue.

¹⁹ A dobe ya me khi a sa khi eri a kanọ eni iguabọ eghọ kua ni a ba me asha to-ẹoli we.

²⁰ Igesikia onana o khi. Eri a kanọ we-a irari khi ẹa mhọli irudunga. Eẹ la ashini a la irari khi a mhọli irudunga. Ama a khi ze ni a ke vuse ike shi ona, ochoghọ a ze ni ulishi o ke mu ẹ.

²¹ Irari khi ini Eshinegba o kholo egbo iJu ni e khi egbegbi iguabọ kua, o mema ya li dobe kholo ẹ kua.

²² Ama a sa abi isomhelemhi ali izese-inmge-a oyi Eshinegba o li. Oo zese ingme-a deba eni e de o le, ama o somhi elemhi ẹ, a kha da la angeli isomhelemhi ne, o ti elemhi ẹ ini a da suọ esọ na li. Ini ọa khi ighọ eri o ya khi ẹ kua.

²³ Ini eni egbo iJu e lase umha miesuọ oyewe le, a ya gbo gbọse we shi egbegbi oni ọọra olivu. Eshinegba o dobe ya gbo gbọse we shi ashini e kpe la.

²⁴ Eri ẹẹ egbo iJeta a li abi uguabọ ọọra olivu onokpo na ifuegua. Ini Eshinegba o lina riele emini aa ya riele, ni o rọ gbọse ẹ shi egbegbi ọọra olivu. Ona o li abi egbo iJu. A lese khi oni Eshinegba o ya gbo dobe gbọse oni uguabọ oyi egbegbi olivu ni a kanọ kwa, shi oni olivu ni a kpe te kanọ we kwa.

A ya mie egbo iZireni pfuese ikpukhokho agbo

²⁵ Mhia nono ni a lese igesikia oyi osheli ni o la akaghọ inyoghuo. Ini a khi dabi khi a lese ingme. Oni osheli khi, umha suọ esọ oyi egbo iJu ọa khi

ona agbọagbọ. Ama oni umha-suesọ oyẹwẹ o ya laọ ramhi ni ẹgbọ iJeta otuongme ni Eshinegba ọ nono ni e bhale deba li, e rọ gba pfo.

26 Ona o khi abi a li ya tsumhi ẹgbọ iZireni nya.

Abi Ebe-no-pfuase o ngme, khi,

“Omiepfuese ọ ya rọte

iZayo bhale,

ọ ya khu ireloegbe Eshinegba

idiegbe imimi iGiekọpu-a.‡

27 Onana khi ilama-kugbe

ni mhi mhọli na wẹ,

oni ẹghẹghẹ ni mhi rọ ya rue

olamhẹ oyẹwẹ ode-a.”§

28 Itobọ khi ẹgbọ iJu e kie usomhi onete ona, e rọ khi ebe Eshinegba, itobọ onete oyẹẹ ni aa khi iJu. Ama itobọ ititita wẹ, e khi ọmọle Eshinegba itobọ khi ọ zẹ wẹ.

29 Irari khi Eshinegba ọa ya mu udu pfi shi isomhopfa ni ọ rọ na ọgbọ ali uzemhi ni ọọ zẹ ọgbọ.

30 Ezeze abi ẹẹ ẹgbọ iJeta a kpe rieḽe umha-suesọ deba Eshinegba ẹghẹghẹ ni o dọḽe, a li mie ilẹlemhi oyi Eshinegba irari umha-suesọ ni ẹgbọ iJu e rieḽe.

31 Ezeze abi ẹẹ ni aa khi iJu a li mie ilẹlemhi itobọ khi ẹgbọ iJu e khi ena umha-suọesọ memena, ighọ wewẹ e ke ya li mie ilẹlemhi.

32 Irari khi eri Eshinegba ọ ri ẹgbọ nya khili ighumha umha-suesọ ni ọ ba mhọli ilẹlemhi na wẹ nya.

A kuẹghie Eshinegba

33 Oghuo ọ doḽe ya mhese

abi ẹpfue, ali ẹgbhali ali ilẹḽe

‡ 11:26 Li zẹ Aza 59.20 § 11:27 Li zẹ iJere 31.33-34

oyi Ẹshinẹgba o limhi ramhi?
 Ọghuo ọ dobe ya lese
 emini o la li udu ni ọ ya rieḽe,
 ali ni ọ dobe ya guano ode eyoli?*

34 “Ọghuo ọ she lese
 udu oyi Ọnọmhue?
 Ọghuo o dobe ya ye ọli ude?”†

35 “Ọghuo ọ ri ongmomhi
 na Ẹshinẹgba ghue,
 ni ọ ya nyene egbe fali ọli lue?”‡

36 Irari khi ọli ọ ma emhi nya,
 obọ oyoli e te la agbo.
 E la ọ gbo na li.

Lọli a ri ufumhi a na agboagbo. Atse§

12

Iluasobo ni o la agbo

¹ Itobọ igho, inyoghuo-mhe, mhi ri itobọ ilelemhi oniemi ni Ẹshinẹgba ọ mhue na awa lema e, a ri idiegbe eye e na Ẹshinẹgba, abi iluasobo ni o kie la agbo, ni o pfuase, ni o ti Ẹshinẹgba eloe. Onana o khi egbegbi ugamhi na elemhi ayemhe ni a dobe ya ga.

² A khi ze ni ingeli eye e ali eyi egbo na agbo e li abeghuo. Ama a ze ni Ẹshinẹgba ọ mu udu eye e pfi mele udu enegbo-a. Eghẹghẹ agho a ya dobe lese abi oghuemhe oyi Ẹshinẹgba o li, a lese emini o ti, ni o gba pfo ni o ri egbe e mu Ẹshinẹgba.

³ Itobọ okhale ni Ẹshinẹgba ọ ro na mhe, mhi ro gue ọli e ye e nya, a khi ke ti egbe e nga dose

* 11:33 Li ze Aza 55.8 † 11:34 Li ze Aza 40.13 ‡ 11:35 Li ze iJobu 41.11 § 11:36 Li ze 1 iKori 8.6

ashini á fu ramhi. Ochoghò, a ke ri ukpèloe itiegbe-tiemhi ekè bino egbe è, ni o de shi abi irudunga ni Èshinègba ọ rọ nẹ o fu ramhi.

⁴ Èzèzè abi awa li zè idiegbe oghuo ni o mhue iguabọ ọdọda ni e bu, ni ẹa ya gbe akanya oghuo,

⁵ ighọ o li khi elemhi iKirisiti ni awa rọte idiegbe oghuo lasele, ni uguabọ ọgbọgbọ ali enekpọle nya e li kugbe iguabọ enekpọle.*

⁶ Isomhopfa ọdọda Èshinègba ọ rọ na awa abi ọ ri ekpabọ na awa ramhi. O kha khi isomhopfa imekèguele ọgbọ ọ mhọli, ọ rọli ke gbe akanya ni o de shi irudunga ni awa nya awa mhọli.

⁷ Ini o khi oyi oni a rọ ọ ga ẹgbọese, ọ ke ga. O kha ke khi oyi oni a rọ ọ sẹsẹ, ọ ke sẹsẹ.

⁸ O kha khi oyi irudushi ẹgbọ ọ o khi ni ọ mie, ọ ke ri udu shi ẹgbọ ọ. Ini oni a rọ ọ kpaghie ẹgbọese obọ, ini e mhọli emini o to wẹ lọ, ọ ke rue obọ-a na ẹgbọ, abi o li pfo ọli udu. Ini oni a la ralo ke mhẹsẹ na ẹgbọ lọ, ọ ri ẹloe shi omhẹsẹ ke mhẹsẹ, o kha khi oyi ilẹlemhi, o ri egbe mu ọli ke riẹle.†

Inono

⁹ Rọte ekelemhi udu oye ke riẹle inono. A kie emhi onobe, a mu eminete mhue ẹgbegbọ.

¹⁰ A nono ingme oyi egbe ẹ ẹgbegbọ, abi ọgbọ ali inyoghuo. A mhue ekpe na ẹgbọ elese ke dọsẹ abi u li mu ekpe na egbe ẹ.

¹¹ Khi li ọwaza akanya igbegbe, ama ri ọmuegbe elemhi ayemhẹ ke ga Ọnọmhue.

¹² Zẹ ni irudushi ni u mhue o ri egbe ke muẹ. Mhue irabọmudu ini u mhue osoli, ke lema ẹghẹghẹ kpa.

* **12:5** Li zẹ 1 iKọri 12.12 † **12:8** Li zẹ 1 iKọri 12.4-11

13 Ke kpaghie inyoghue ni e mhue otomhe obo. Ke mu egbo epfese.

14 Ke so iromhi ikhivose na egbo ni e mu okholi e vule shi e o. Ke khivose na egbo, khi ku itse na ogbo.‡

15 Nu egbo ni e mhue oghelē ke ghele, u nu eni ee vie, ee vie.

16 A ri opfomhe nu egbe e ke la. Khi khi ogbo ni o o ti ike e nga, ama ke timama egbo ni ea pfue. Khi riēle khi u ma lese dose. §

17 Khi ri onobe fali ota onobe. Kuegbe-a ke riēle emini o ti egbo nya eloe.

18 Ini o ze ya riēle, roshēka odekhode, ni u ro nu egbo nya la kugbe elemhi opfomhe, ini o khi obo oye o kpole shi.

19 Emolemhe, a khi mie abo okholi, ochogho a ze Eshinegba o mie abo okholi na e. Irari khi Ebe-no-pfuase o lie, “Mhemhe mhi mholi imieabo okholi, mhi ya fali we ota.” Igho Eshinegba o ngme.*

20 Ochogho a ke riēle abi Ebe-no-pfuase o ngme khi, “Ini okiamhi o o gbe obe e, ri eminale na li le. Ini okiamē o o gbe oli ri amē nali da. Irari khi ini u li na, eri u we ingamhi erē a nga li ukhomhi.” †

21 Khi ze ni onobe o mu e le, ama ri onete mu onobe o le.

13

Iregbe-tiemhie na eni e la ukpekhomhi omhese

1 Ogbokpa o ke suo esō na eni e la ukpekhomhi omhese. Irari khi Eshinegba lolighuo tse o dobe ze

‡ 12:14 Li ze iMat 5.44; iLuk 6.28 § 12:16 Li ze Ekpi 3.7 * 12:19 Li ze iDeut 32.35 † 12:20 Li ze Ekpi 25.21-22

ẹ ọgbọ shi ukpẹkhomhi omhẹsẹ. Ẹshinẹgba ọ ri eni e la ukpẹkhomhi omhẹsẹ nya leghie.

² Irarigho, ọgbọ ni ọ da mu okhọli vule ẹ shi eni ẹẹ mhẹsẹ ọ ne, eri e mu okhọli ẹ vule shi emini Ẹshinẹgba ọ rọ migha. Eni e da ligho ne, ipfẹzọmu e nono ẹ ghi egbewẹ.

³ Irari khi eni ẹa guẹ ngeli a zẹ enighie e ke nase, ọa khi eni e guẹ ngeli. Irarigho oni ọọ riẹlẹ ọkhọlọ ọ na ulishi ena omhẹsẹ. Waa nono ni u pfue ulishi oyi ẹgbọ ni e la ukpẹkhomhi? Ke riẹlẹ emini o gbe akanya. Ini u li ghọ, e ya kuẹghie.

⁴ Irari khi eni e la ukpẹkhomhi omhẹsẹ, Ẹshinẹgba ọ zẹ wẹ ni e ke kpaghie ẹ obọ. Ama u kha riẹlẹ emini ọa gbe akanya, ke na ulishi oyewẹ, irari khi e mhue itoto ni e rọ ya nase. Eni ẹẹ ga eyi Ẹshinẹgba e khi, ni ẹẹ nase eni ẹa ya suọ esọ, ni o rọ khasẹ khi elemhi ẹẹ bi Ẹshinẹgba shi ọ.

⁵ Irarigho, zẹ ni u ke nyẹsẹ ukhomhi na eni e la ukpẹkhomhi omhẹsẹ, itobọ khi emini o ti lọ ni u ke riẹlẹ, aa khi itobọ elemhi ibibi oyi Ẹshinẹgba tse.

⁶ Onana o li zẹ khi u mema ya zẹ oga, irari khi eni e la ukpẹkhomhi omhẹsẹ eni ẹẹ ga eyi Ẹshinẹgba e khi, ni e ri ẹghẹghẹ oyewẹ nya na akanya omhẹsẹ.

⁷ Fali ọgbọkpa ota ni u lo ọli. Ini u lo ota oga, zẹ ọli, okekhi ozẹla, zẹ ọli, ri ekpe ke na ẹgbọ, u nyẹsẹ ukhomhi na wẹ.*

A ke riẹlẹ inono irari oni ogbele o she ti ramhi ana

⁸ Khi lo ọgbọ ota emhikhoghwo, se ni ota inono ingme oyi ọnuzava oye tse! Irari khi ọgbọ ni ọ da nono ingme oyi ọnuzava oyọli ne, ọ she ri ushi gbe akanya.

* 13:7 Li zẹ iMat 22.21; iMak 12.17; iLuk 20.25

⁹ Ishi ni ẹẹ, “Khi kia okia,” “Khi gbe ugbeli,” “Khi do ughiatọ,” “Khi zẹ ni emhi ọgbọ o to ẹ egbe,” Ali elese ni e kpọle nya, ushi oghuo o zẹ wẹwẹ nya ukhomhi, ni ọọ, “Nono ingme oyi ọnuzava oyẹ abi u li nono ingme oyi egbe ẹ.”†

¹⁰ Ọni ọ da nono ingme oyi ọnuzava ọyọli ne, ọa tigbe ya li ọ li onobe. Irarighọ, inono o khi irushi gbe akanya.

¹¹ Ke riẹle ona, lẹsẹ ẹghẹghẹ ni a la memena. Ẹghẹghẹ o she ramhi ni u rọ ya rọte olesẹ guale. Irari khi ẹghẹghẹ imiepfuese oyawa ni o kpe ukhokho o she ti bhale dọsẹ ẹghẹghẹ ni awa rọte odode miesuọ.

¹² Ẹlẹ iyosẹ ọ she ẹ dọsẹ, ogbe o she ẹ gbe-a. Awa khi ke ngeli abi ẹgbọ ni e la alo ebili, awa mema mu egbe ni awa rọ ya la elemhi ákpá.

¹³ Awa guẹ ke ngeli abi ẹgbọ ni e la ákpá. Awa khi nu wẹ ye ukue ebe ni e la riẹle efiala, ali idonyọ guọghọ-a. Awa khi kia okia ke mu ighue ebe. Awa khi la agbọ okhọli wẹkhi agbọ iviẹ shi emhi ọgbọ.

¹⁴ Ochoghọ awa ri iJesu iKirisiti Ọnọmhue sọ abi awulu. Khi ke sa abi u li ya riẹle ọghuẹmhe eyi idiegbẹ olamhe.

14

A khi ke ri unu zẹ ẹgbọsẹ ifue

¹ A mie ọgbọ ni irudunga oyọli ọa lolo toto. Khi nu ọli ke khakọ shi emini ọ mieshi ni o khi ọda shi oyẹ.

† **13:9** Li zẹ Okiali 20.13-15,17; iDeut 5.17-19,21; iLev 19.18

² Irari khi egbo eghuo e miesuo khi o ti ni a ke le emhikpa. Ama ogboese ni irudunga oyoli oalolo toto, o lese le ebe tse.

³ Ogboni o le emhikpa, o khi ri eloe gbe oni oalya le, ogboni oalya le emhikpa, o khi gue oni o le emhikpa ezoo. Irari khi Eshinegba o ga mie we.

⁴ Oghuo u khi ni wa ke gue aghiusomhi oyi ogboese ezoo? Oga oyoli tse o dobe e lie khi o gueli, ali khi oalya gueli. O yamigha, irari khi Onomhue o dobe yaroli migha.

⁵ Eri egbo eghuo e dabi khi ogbele oghuo o mu eloe dose olese. Ogboni olese oo khi abeghuo ogbele nya e li. Ogbogbo o ri udu oyoli shi asha ni o migha shi.

⁶ Oni o bino khi ogbele okhoghuo o la o ni o mu eloe ne, eri o roli ri ufumhi na Onomhue. Ogboni o le eminale, o le oli ri ufumhi na Onomhue, irari khi Eshinegba o kphemhi na, oni oalya le, Onomhue o roli mu ekpe na, o kphemhi na Eshinegba.*

⁷ Aa me onge-awa ni o la agbo na egboli tse, we khi eri a me onge-awa ni oo ghu-a na egboli tse.

⁸ Ini awa la agbo, Onomhue awa la o agbo na. Ini awa ghu-a, Onomhue awa ghu-a na. Awa la agbo o, awa ghu-a o, oyi Onomhue awa khi.

⁹ Onana o ze khi iKirisiti o ghu-a, o gualeni o ro khi Onomhue oyi egboni e ghu-a ali egboni la agbo.

¹⁰ Yeye o ye, elo o ze ni u ro a gue inyoghue ezoo mena? Yeye o ye, elo o ze ni u ro ri eloe e gbe inyoghue. Awa nya awa yamigha odalo oyi Eshinegba ni o gue awa ezoo.†

* **14:6** Li ze iKolo 2.16 † **14:10** Li ze 2 iKori 5.10

11 Irari Ẹshinẹgba ọ lina ngme ọli shi Ebe-nopfuase khi,

“ ‘Aborokhia khi mhi la ọ egho,
 Onomhuẹ ọ lina ngme,
 ‘Ogbokpa ọ ya wugha mhe odalo,
 Ogbokpa ọ ya guele khi
 mhemhe mhi khi Ẹshinẹgba.’ ” ‡

12 Itobọ igho, ogbokpa ọ ya gue khasẹ Ẹshinẹgba abi ọ li gbe.

A khi yese egbe e de

13 Itobọ igho, lase iguegbe-ẹzọ le. Ochoghọ, mhọli ọli shi udu oye khi u waa ya kpe emhi wekhi ọzuode shi eke ni inyoghuo e ọ khọlọ awe shi.

14 Ikugbe ni mhemhe ali iJesu anye kugbe, o rokhase mhe khi emhi khoghuo ọa la ọ ni ọa pfuase. Ama ini ogbọ ọ mhọli ọli shi udu khi emhi ọa pfuase, loli oni emhi ogho ọa pfuase shi ọ.

15 Ini u yese inyoghuo udu-a, irari eminale ni u le, inono ọa ke la oni angeli. Khi ze ni eminale nu le, o ri inyoghuo e ni iJesu ọ ghu-a na de.

16 Khi ze afa ni u mhọli ro ọ le emhikpa, ni u roli ri omama ghi iKirisiti.

17 Irari khi Eghiele oyi Ẹshinẹgba ọa khi ingme eminale ali onyo idada, ama oyi ipfuase, ali opfomhe ali oghelẹ na Ayemhe-no-pfuase.

18 Ogbọ ni ọ da lina ga iKirisiti, ọ ma ti Ẹshinẹgba eloe, egbọ e mu ekpe na li.

19 Itobọ igho, ke riẹle emini e ri opfomhe e bhale, ni e gbo ya kpaghie ogbokpa ro mhọli imiesuo ni o toto.

‡ 14:11 Li ze Aza 45.23

20 Khi ri itobọ eminale pfulẹchẹ emini Ẹshinẹgba ọ riẹlẹ-a. A dobẹ ya le emhikpa, ama ọa ti ni a rọ bhale ya ẹ khi emini u wa le, o zẹ ni ọgbọ olese ọ de pfilo olamhẹ.

21 O tinẹ ini u waa bie le emhikhoghuo wẹkhi eri u da onyọ, wẹkhi eri u riẹlẹ emhikhoghuo ni o ya zẹ inyoghue de.

22 Irarigho, emini u mieshi ingme enana nya rọli shi iteva oye ali Ẹshinẹgba. Oghelẹ o khi ni ọgbọ ni ọa pfa ẹzọ mu egbọli shi emini ọ riẹlẹ ni ọ mie shi khi o gbe akanya.

23 Ama ini ọgbọ ni ọ mhue akhokhomhẹ ọ da kie le, a she pfa ẹzọ mu ọli. Irari khi ulemhi ni ọ le ọa khi rọte irudunga. Emini ọa da rọte irudunga bhale ne, olamhẹ o khi.

15

1 Awa ni awa toto shi irudunga, awa kha ke ri egbe mie na eni ẹa toto irudunga. Awa khi ke lẹsẹ riẹlẹ egbe awa ti tseẹ.

2 Ochoghọ, ọgbọgbọ o ke riẹlẹ inyoghuo ọli emini o ti ọli egbe, ni o rọ kpaghie irudunga oyọli, ni o vule.

3 Irari khi iKirisiti ọa riẹlẹ egbọli tseẹ ti. Ochoghọ, abi Ebe-no-pfuase o ngme ni ọọ, “Ẹshinẹgba, itsuemhi ni ẹgbọ e tsue ẹ, o de nga mhẹ egbe.”*

4 Emini a keke shi Ebe-no-pfuase nya, eri a keke ọli ni a rọ sese awa ingme, ni a bhale ya ẹ khi iregbemie ali irudusho ni Ebe-no-pfuase o rọ na awa, o ri awa mholi irudushi.

* 15:3 Li zẹ *Iwolo* 69.9

⁵ Eshinẹgba ni ọ khi ọni ọ ri iregbemie, ali irudushọ ọ na ọgbọ, ọ ka rẹ ẹ mhue usamhi oghuo abi a liẹ deba ẹte-awẹ eyi iJesu iKirisiti.

⁶ Ni ẹẹ nya a ri udu oghuo ali uruli oghuo kuẹghie Eshinẹgba ni ọ khi ita iJesu iKirisiti Ọnọmhue oyawa.

⁷ Awa ke lama ingme egbe abi iKirisiti ọ li lama ingme oyawa, ni o ri ikuẹghie bhale ghi Eshinẹgba.

⁸ Itobọ khi mhi gueye ẹ khi iKirisiti ọ she bhale abi ọni ọọ ga ọgbọ na ẹgbọ iJu, ni o rọkhasẹ khi Eshinẹgba igesikia ọ khi, ni o rọ mu ma ishobọ ni ọ shi na itita awa,

⁹ ni iJeta e kuẹghie Eshinẹgba shi ilelemhi oyọli.

Abi a li kẹkẹ ọli khi,
“Irarighọ, mhi ya kuẹghie ẹ
iteva ẹgbọ iJeta.

Mhi ya to uwolo
kuẹghie eva oyẹ.”†

¹⁰ O gbolo ẹ,
“Eẹ iJeta, ni a kuma
ẹgbọ eyọli ke ghẹle.”‡

¹¹ O gbolo ẹ,
“A kuẹghie Eshinẹgba
ẹẹ ẹgbọ iJeta,
a to uwolo kuẹghie ọli
ẹgbọ nya.”§

¹² Azaya ọ gbolo liẹ,
“Omiomi ijese ọ ya fu vule,
ọni ọ ya vule mhẹsẹ na ẹ iJeta,
ẹgbọ iJeta e ya ri udu nga li.”*

† 15:9 Li zẹ 2 iSam 22.50; Iwolo 18.49 ‡ 15:10 Li zẹ iDeut 32.43

§ 15:11 Li zẹ Iwolo 117.1 * 15:12 Li zẹ Aza 11.10

13 Ẹshinẹgba ni a rọte obọ oyọli ẹ mhue irudushi, ọ ri oghẹle ali opfomhẹ ne rọte iregbenga ni a mhue nali, ni a rọ bhale ya ẹ khi irudushi oyẹẹ ọ fu sho rọte ekpabọ oyi Ayẹmhẹ-no-pfuase.

IPọlu oni a ze ọ khi oni ọ gbe akanya na ẹgbọ ijeta

14 Inyoghuo-mhẹ, mhẹmhẹ oyẹmhẹ mhi mhue imieshiọ khi onete o vọ ẹ egbe, khi ilẹse o gba na ẹ ni a rọ dobe ya ke sese egbe ẹ.

15 Mhi she kpẹ gue ingme eghuo ye ẹ gboo el-emhi ebe ona ni mhi gbolo ẹ yele ẹ le ena. Itobọ afu ni Ẹshinẹgba ọ rọ na mhẹ,

16 ni mhi rọ khi aghiusomhi na kẹẹ oyi iJesu iKirisiti na ẹgbọ ijeta. Eri mhia gbe akanya ọkpodalo-ugamhi oyi Ẹshinẹgba, ni a rọ tsabọ usomhi onete oyi Ẹshinẹgba, ni a rọ bhale ya ẹ khi ẹgbọ ijeta e li khi iluasobo, ni Ẹshinẹgba ọ mie, eni Ayẹmhẹ-no-pfuase ọ khuese-a pfuase.

17 Rọte iJesu iKirisiti mhi te ẹ mhọli egbe-imumhẹ shi ugamhi ni mhia ga Ẹshinẹgba.

18 Mhi aa ya gbudu ngme emhikhoghuo, seẹ ni emini iKirisiti ọ rọte obọ oyẹmhẹ riele rọ ri ẹgbọ ijeta suọ esọ na Ẹshinẹgba, rọte ungmehi ali ikanya oyẹmhẹ,

19 rọte ekpabọ eyi ọlele ali onyaloa, ali rọte ekpabọ oyi Ayẹmhẹ-no-pfuase. Ighọ mhi rọte iJerusalemu ngme ungmehi usomhi onete oyi iKirisiti ya ramhi iLirikumu.

20 O ma kie kpẹ khi emini o la mhẹ udu ni mhi rọ ngme ungmehi usomhi onete ye ẹgbọ ni ẹa kie suọ ungmehi oyi iKirisiti ne, ini mhi khi ya to nga irogbekẹ ni oghoese ọ rọ gbe.

21 Abi Ebe-no-pfuase o ngme ọ khi,

“Egbọ ni aa kpe
 gue ingme oyọli yẹ ne,
 e ya mẹ, ali khi eni ẹa kpe suọ,
 o ya ye wẹ.”†

Ugbamhi ni iPolu o gba, khi lọli ya ye iRomu

22 Akanya oyemhẹ ona o zu mhẹ ode, ni mhi aa
 rọ mẹ asha bhale deba ẹ.‡

23 Aborokhia khi mhi aa ke mhue ikanya ni e kpo
 mhẹ le shi ikpe ena, ali ni o rọ gbo khia khi ikpe
 ebubu na ni mhi te ẹ nono ni mhi bhale ya mẹ
 egbo,

24 o la mhẹ udu khi mhi ya rọte olieye ẹ ini mhia
 lẹ iSipeni. Mhi sa khi a dobe ya ri ikpaghiobo na
 mhẹ ni mhi rọ ti okiali oyemhẹ je odalo, ini awa ri
 egbe mu egbe ukuku egheghe se.

25 Mena, mhia je iJerusalemu ni mhi ya kpaghie
 egbo eyi Eshinegba obọ.

26 Irari khi o ghọle eni miesuọ ni e la eke iMasi-
 donia ali Akhaya ni e ri ikpaghiobo na egbo eyi
 Eshinegba ni e la iJerusalemu.§

27 Egbe ẹ mu wẹ khi wẹwẹ e lighọ riele ọli, e rue
 ọli shi khi ota wẹwẹ e lo wẹ. Irari khi ini egbo iJeta e
 kemhi ikhivose ayemhẹ oyi egbo iJu, eri o li abi ota
 ni egbo iJeta e lo egbo iJu.*

28 Ini mhi gbe akanya ona se ni mhi rọ mẹ ọli
 mẹ khi e she mie ikpagho ena se, mhi ya je iSipeni,
 mhi ya kọ feli ẹ ini mhia lẹ.

29 Mhi lese ọli gboo khi ini mhi bhale, ikhivose
 oyi iKirisiti ni o vọ tsululu mhi rọ ya bhale.

† 15:21 Li zẹ Aza 52.15 ‡ 15:22 Li zẹ iRom 1.13 § 15:26 Li zẹ 1
 iKori 16.1-4 * 15:27 Li zẹ 1 iKori 9.11

30 Mhi ri iJesu iKirisiti Ọnọmhuẹ ọyawa ali inono ni Ayemhẹ o rọ na awa lema ẹ inyoghuo, a nu mhe sọ iromhi ali a gbo sọ iromhi na mhe.

31 Sọ iromhi Ẹshinegba ọ tsumhi mhe obọ oyi ẹgbọ ni ẹa miesuọ na eke iJudia ali ni ẹgbọ Ẹshinegba ni e la ẹoli iJerusalemu ni e mie eni ikpaghọ ni mhi rọọ ghi we.

32 Ni a rọ bhale ya ẹ khi rọte ọghuemhẹ oyi Ẹshinegba, mhi dobe ri udu oghẹle bhale deba ẹ ali ni awa ri udu shi egbe ọ.

33 Ẹshinegba oyi opfomhẹ ọ ka nu ẹẹ nya la, Atse.

16

Otse ni iPolu lolighuo ọ tse ẹgbọ ke

1 Mhi gue ingme onete oyi iFobi ye ẹ, ikhi inyoghuo awa ni ọkpotoso, ni ọ khi ọni ọ ralo shi eni e miesuọ ni e la ẹoli iKenkhiria.

2 A ri eva oyi Ọnọmhuẹ kpẹ abọ mie ọli, abi ẹgbọ eyi Ẹshinegba e ye ni e li. A ri ikpaghiẹ obọ onini ọ da ya nono obọ oye ẹ na li. Irari khi anamelo oyemhẹ ali ebubu ẹgbọese ọ khi.

3 Mhia tse iPisilia ali Akuila ni e kpaghiẹ mhe obọ shi akanya oyi iJesu iKirisiti.*

4 E ri agbọ oyewe shi okhena irari oyemhẹ. Oa khi weweghuo tse mhia tse uwegbe, ama li shi igbaa nya eyi eni e mie iKirisiti suọ enayi ẹgbọ iJeta.

5 Mhi gbo li tse igbaa oyi eni e mie iJesu iKirisiti suọ ni o la owa oyewe.

Mhia tse egbegbi omolemhẹ Epanetusu ni ọ khi ọgbọ ọnodode ni ọ mie iKirisiti suọ ukiẹkiẹ eke Esha.

* **16:3** Li zẹ Ika 18.2

⁶ Mhi tşę iMeli ni ọ toto obo a gbe akanya na ę.

⁷ Mhi tşę Adironikusi ali iJunayasi, ęgbọ iJu nabi mhemhę ni anye ga la owa ighumha. Eni a mu ekpę na e khi elemhi idiegbe oyi ighiusomhi na kęę. Ama e kpe miesuo khe mhe.

⁸ Mhia tşę Amipiliatusi, egbegbi omolemhe, ni mhi mhue inono na elemhi Onomhue.

⁹ Mhia tşę Urubane, ni ọ kpaghie anye obo akanya oyi iKirisiti.

Mhi gbo tşę iSitachisi, egbegbi omolemhe.

¹⁰ Mhia tşę Apelesi, ni a me gboo khi igesikia ọ ro deba iKirisiti.

Mhi tşę ena omhue-apfe oyi Arisitobulusi.

¹¹ Mhi tşę Erođioni ni ọ khi inyoghuo-mhe.

Tşę eni e miesuo na omhue-apfe oyi iNakisusi.

¹² Mhia tşę iTirifeana ali iTirifosa eni ikpotso egho ni e gbe akanya oyi Onomhue egbegbo.

Mhi li tşę egbegbi omolemhe iPesisi oni okpotso ni ọ gbe ukpokpomhi akanya na Onomhue.

¹³ Mhia tşę iRufosi, ogbakanya ni a ze oyi Onomhue, ali inyoli ni ọ li abi inyoshi mhe ọ.[†]

¹⁴ Mhi tşę Asikiritusi, ali iFilegoni, ali Ameşi ali iPatirobasi ali Amasi ali eni e miesuo ni e ga la.

¹⁵ Mhia tşę iFilologusi ali iJulia ali iNirusi ali inyoghuo oli ni okpotso ali Olimpasi ali ęgbọ Eshinegba nya ni e nu we la.

¹⁶ A tşę egbe ę otşę onete, a ghele mu egbe abi inyoghuo.

Igbaa nya eyi eni e mie iKirisiti suo, ę tşę ę.

¹⁷ Mhi lema ę, inyoghuo, a ke to okpe ęgbọ ni ę pfi okemhi ali ni e ri ęgbọ de irudunga ni e mhue-a, eni

[†] **16:13** Li ze iMak 15.21

osese oyewe ọa de shi osese ni a sese awa. A nuata shi we ọ.

¹⁸ Irari khi egbo ni e riele emhi eghogho ẹa ya ga iKirisiti Onomhue oyawa, ama elemhi oyewe ẹ ga. Rote eta-olelemhunu ni e ngme, e ro ọ di usamhi udu oyi egbo eghuo ni ẹa mhuẹ ilẹse.

¹⁹ Ogbokpa ọ she suọ abi a li ri ungmemhi oyi Eshinẹgba a gbe akanya. Itobo ona mhi ro ghele shi ingme oyee. Ama mhia nono ni a fialo-a shi emini o khi onete, ama a khi fialo-a shi emhi onobe.

²⁰ Eshinẹgba oyi opfomhe ọ ya kele guogho okphaghie-a shi e ekowe. Okhale oyi iJesu iKirisiti Onomhue oyawa o ke deba e nya.

²¹ ITimoti ni anye ga a gbe akanya, ọọ tse e. Igho khi iLushosi ali iJasi ali iSosipata, ni anye ga khi iJu.‡

²² Mhemhe iTetiusi ni mhi ri ugba ma a keke ebe ona na iPolu, mhi tse e, abi oni ọ miesuo.

²³ IGayusi ni ọ ri owa oyoli na mhe kushi, ni ọ gbo ri ukpeloe e khu mhe, ni ọ lama eni e miesuo e ke legba owa oyoli, ọọ tse e.

Erasitosi, ni ọ ri ikpago ọ shi na ẹoli oyewe ali inyoghuo anye ikhi iKaritusi, ee tse e. §

²⁴ [Okhale oyi iJesu iKirisiti Onomhue oyawa o ka nu e la, Atse.]

²⁵ Ufumhi khi oyi Eshinẹgba! Loli ọ dobe re migha shi irudunga oye e abi o li de shi oni usomhi onete oyi iJesu iKirisiti ni mhi ro ọ tse abo, ali ni o de shi irokhase oyi osheli ni a ro sheli agboagbo elemhi ikpe ebubu ni e dose.

‡ 16:21 Li ze Ika 16.1 § 16:23 Li ze Ika 19.29; 1 iKori 1.14; 2 iTimo 4.20

²⁶ Ama mena, a she ri oni igesikia khasẹ, rọte akẹkẹ shi eke enayi emekẹguele, abi Eshinẹgba ni ọ la ọ agbọagbọ ọ mhẹse ọli a li rọli khasẹ ishishi nya, ini e ba miesuọ ni e suọ esọ na luẹ.

²⁷ Eshinẹgba ọna ilẹse, a ri ufumhi na agbọagbọ, rọte obọ oyi iJesu iKirisiti! Atse.

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

03be06b0-68fd-500b-b9a9-6bca4b63979a